

# Carta a los HEBREOS

Ī macu suorine ĩ ocare Dios ĩ gotimasiore queti

**1** 1 Tirũmũju cojoji me mani ñicũare Hebreo masare ĩnare gotimasioñuju Dios. ĩre gotirẽtobosariarã suorine ĩnare gotimasiñuju ĩ. ĩna gotise rĩ me ĩnare yimasiomasiñuju. Gaje-ye quẽne, ricati ĩnare ĩ yiroticõamasire rãca ĩnare yimasiomasiñujarã. To bajiri, “To bajiro tũoĩagũ ñagũmi”, yimasĩnujarã ĩna, mani ñicũa. **2** To bajiri yucũrirema, Dios ĩ macũre manire ĩ cõajare, quẽnaro Diore masiaja mani. Macarũcũro, õ vecaye ñajediro ĩ macu suorine tire rujeomasiñuju Dios. ĩ macũne ñaami, “Jediro macarũcũroayere cũorũcũja mũ” ĩ yimasirĩ. **3** Dios macũre ajitirũnũrã ĩre masirã ñari, “Rẽtoro ñamasugũ ñagũmi Dios”, yimasiaja mani. Diore masirã ñarãma ĩ macũre masirã. ĩ macũre quẽnaro masicõari, “Ī jacũre bajirone bajigũ ñagũmi”, yimasiaja mani. ĩ macũne ñaami, “Adi macarũcũroaye bajimũorũgõato” yirotimasirĩ. ĩne ñaami, Diore ajitirũnũrã rojose mani yise vaja manire rijabosacõari, Diorãca ñajedirore rotigũ.<sup>a</sup>

**“Ángel mesa rẽtoro ñamasugũ ñaami Dios macu”, yire queti**

**4** To bajiri adirũmũri Diorãca rotigũ ñari, Diore moabosarã ángel mesare rẽtoro ñamasugũ ñaami Dios macu. **5** ĩ sĩgũne ñamasugũ ĩ ñajare, ado bajise ĩre yiyumi Dios:

“Adirũmũne yũ macu ñari, yũre bajiro rotiscũorũcũja mũ”, ĩre yimasĩnuju Dios.

Ángel mesarema, to bajiro ĩnare yibesumi Dios. Gãjerãre quẽ-

---

<sup>a</sup>1.2,3 Jn 1.1-3.

ne, ti ùnire yibecune ì macu sîgũrene tuoïagũ, ado bajiro yiyumi Dios:

“Ì jacu ñaja yu. To bajiri yu macu ñaami”, ìre yiyumi.

**6** Ì macu ñamasugũre, adi macarucurojũre ìre cõagũ, ado bajise ìre yiyumi:

“Ángel mesa quẽne mũre rûcubuo jedicõararãma ìna”, yiyumi Dios.

**7** Ìre moabosarimasa ángel mesare yigũ, ado bajiro yiyumi Dios:

“Ángel mesare yu rotijama, yoaro me mino ti vētuvasere bajiro yoaro mene yũre cudiruarãma. To yicõari, jea ùjũse guaro ti ùjũjẽnirore bajiro yũre moabosaruarãma ìna”, yiyumi Dios, ángel mesa ìre ìna moabosarotire yigũ.

**8** Ì macu ñamasugũre yigũ, ado bajirojũna yiyumi Dios:

“Yu macu ñari, Dios ñaja mu. Mu rotise jedibetiruaroja. Masare mu rotijama, yu bojarore bajirone quẽnaro rotirucuja mu.

**9** Yu bojarore bajiro quẽnaro yigũ, rojosejũarema yibetirucuja yituoïarũgũcaju mu. To bajiro yicacu mu ñajare, ‘Gãjerã rẽtoro ñamasugũ ñaja’ mũre yaja yu. To bajiro mũre yu yijare, bũto variquẽnaja mu”, yiyumi Dios, ì macũre.

**10** Quẽna gajeye ado bajise yiyumi Dios, ì macũre yigũ:

“Rẽmojũne adi macarucurore rujeomasicaju mu.

**11** Mu rujeomasicati jedirone ti jedicoaboajaquẽne, mũjũnata, ñacõa ñarũgũrocu ñaja mu, Dios ñari.

**12** Sudì ìna sãñasosere vejecõari, gajeye quẽnase ìna vasoasãnarore bajiro, adi macarucuro ñase ti jedirone quẽna gajeye vasoarucuja mu. Mũma, rijabetirocu ñari, mũne ñacõa ñarũgũrucuja mu”, ì macũre yiyumi Dios.

**13** Quẽna, ì macu sîgũrene ado bajise yirũcubũoyumi Dios:

“Rũcubũoriajũre rujiya maji. Mũre ìaterãre, ‘Rojose yitũjaya’ ìnare yu yiro bero, rojose yimasibetiruarãma. To cõrone rotisũorucuja mu”, yirũcubũoyumi Dios, ì macũre.

Ángel mesarema, to bajiro yibetimasĩnuju Dios. **14** Ángel mesama, ruyumena ìre moabosarã ì cõarã ñarãma. To bajiri,

Diore ajitirūnūrā ō vecajū quēnaro ī rāca ñaronare ejarēmōrā ñarāma ángel mesa.

**“Ī macu suorine quēnaro manire Dios ī yivotire ajitirūnū tujabetiroti ñaja”, yire queti**

**2** 1 Dios macu ñamasugū ī ñajare, ī ocare butobusa ajitirūnuto mani, tire mani ajitirūnū tujajama, “Quēnaro manire Dios ī yivotire masiriticōari, rojose yirobe” yirā. **2** Tirūmujū ángel mesa suorine, Dios ī rotimasire Moisére ejamasīñuju ti. Tire, “Dios ye masu ñañuja”, yimasiaja mani. Tire cūdibetimasiriārā ñaboarine, rojose Dios ī yivotire masicōari, bojabetimasīñujarā. To bajiro bajirā ñaboarine, rojose tāmno jedicōamasīñujarā ĩna. **3-4** To bajiri Dios ī yirere masiboarine, ī rotimasire rētoro quēnasere mani ajitirūnū tujajama, “No bajirojua yicōari rojose manire yibeticōato Dios”, yimasibetiruarāja. Rēmojune mani ujū Jesús ñañuju, adirodori Dios ī yarāre quēnaro ī yivotire gotisūorí. Īre ajiriārā, ti ocare manire gotirētocama ĩna. To yicōari, Dios suorine jairo ĩañañamanire manire yīocama. To yicōari, Dios ī bojarore bajiro ĩna yimasirotire yigū, tocārācurene ricati rīne ī masisere ĩnare ujoyumi Espiritu Santo. To ī yijare, manire quēnaro gotimasiocama ĩna. To bajiri, “Cristo oca socase mene bajaiaja ti”, yimasicoacajū mani quēne.

**Jesucristo manire bajigū ī ñare queti**

**5** Diore moabosarā, ángel mesarema, “Adi macarucuro jedirore rotiruarāja ma”, ĩnare yibesuju Dios. **6** Masajurema, “Adi macarucurore rotiruarāja ma”, ĩnare yimasīñuju. Sīgū, Diore ī sēnirere ucagū, ado bajise ucamasīñumi:

“Dios, ¿no yigū ñamasurā me uua ñaboajaquēne, uua-re masiritibeați mū?

**7** ‘Ángel mesare bajiro bajibeticōato’ yigū, ‘Ñamasurā me ñaruarāma’, uua-re yiyuja mū. To bajiro uua-re yicūrí ñaboarine, ‘Ñamasurā ñato’ uua-re yicūñuja mū quēna.

**8** ‘Adi macarucuro ñase jediro mū cūrere rotimasiato’ yigū, uua-re cūñuja mū”, yīucamasīñuju sīgū, Diore sēnigū.

“Noajūane masare cūdimena maniruarāma” Dios ī yire ti ñaboajaquēne, ñajediro manire cūdijedibeamā maji. **9** To

bajiboarine, sīgū adi macarucuroaye jediro rotimasigūre masiaja mani, Jesús vāme cūtigūre. Ī bajirere ado bajiro masiaja mani: Ángel mesa rētoro ñamasugū ĩ ñaboajaquēne, “Yoaro meaca ñamasugū mere bajiro bajirucumi” yigū, adigodojūre ĩre cōañumi Dios. To bajiro ĩ yicōarí ñari, manire rijabosayumi Jesús. Rojose tāmucōari, ĩ rijabosare ñajare, “Jediro cūñ ñamasugū ñarucumi”, ĩre yiyumi Dios.

**10** Adi macarucuro ñase jediro Dios ĩ rujeore ñaja. Quēnaro ĩ rotimasijare, adi macarucuro bajise jediro bajiñarūgūaja. Jediro Jesucristo suorine, “Yū yarā ñaama” Dios ĩ yīārā, “Yū tūñ ejamasiruarāma”, ĩnare yiyumi Dios. To bajiro yigū ñari, “Rojose ĩna tāmucoborotire yirētobosaaya” yigū, ĩ macure cōañumi Dios. To bajiro ĩ yiroticōajare, rojose tāmucōari, manire rijabosayumi Jesucristo. **11** To bajiri, Jesúrāca ñarā ñari, sīgū rīare bajiro bajirā ñaja mani. Mani quēne, Dios rīa mani ñajare, bojonebecūne, “Yū bederā ñaama”, manire yigūmi Jesús. **12** To bajirone gotiaja Dios ocare masa ĩna ucamasire:

“Mū bajisere yū bederāre ĩnare gotirucūja yū. ĩna rāca rējacōari, mūre variquēnarā, basaruarāja yū”, yigotiaja.

**13** Quēna gajeye ado bajise gotiaja, Jesús Diore ĩ yirotire yiro: “Yūre ejarēmogucumi’ Diore ĩre yitūoĭaja yū”, yigotiaja.

Quēna gajeye, ado bajiro gotiaja:

“Yū rīare bajiro bajirā ñaama’ Dios ĩ yicana rāca adojū ñaja yū”, yigotiaja, Jesús ĩ yirotire yiro.

**14** Mani, Dios rīa, sīgūre bajirone rujū cūti, rīi cūti bajijaja mani. To bajiri, Jesús quēne, Dios macū ñaboarine, manire bajirone rujū cūticōari, manire rijabosayumi. To bajiro ĩ bajijama, ĩ rijabosase suorine rojose tāmucotūjabetiriarojū masare vāti ĩ varotiboasere tire tegū bajiyumi. **15** Adi macarucuro ñarā rojose yirā ñari, bajireacōari bero, “Rojose yiecoruarāja” mani yitūoĭagūiiboarere “To cōrone gūitūjato ĩna” yigū, manire rijabosayumi. **16** To bajiri, “Ángel mesare ejarēmogū bajiyumi Jesús”, yibeaja mani. Ado bajirojūa yimasiaja mani: “Diore Abraham ñamasirí ĩ tūoĭariarore bajiro tūoĭarājūare manire ejarēmogū bajiyumi”, yaja mani. **17** To bajiri manire bajiro rujū cūticōari rojose tāmucōñumi Jesús. Adi macarucuro ñagū paia cūñ ĩ ñagōbosaro rētoro ĩ jacū ĩ ñarojū ĩ rijabosariarāre

“Ñagōbosagusa” yigũ bajiyumi Jesús. Dios ï ïajama, masa ïna bajisere quēnaro gotirētosagũ, to yicōari masa rojose tāmno-rāre ïnare ïamaigũ ñañumi. ïne ñañumi masa rojose ïna yise vajare “Ïnare masirioato Dios” yigũ, rojose tāmnoçōari, ïnare yirētosarí. **18** Cojojirema Dios ï bojarore bajiro ï yise, bũto josarũgũñuju ti, Cristore. To bajiri rojose tāmnoñuju ï. To bajirone bajiaja manire quēne. Manire bajiro bajirí ñari, Diore mani cūdiroti ti josajama, manire ejarēmomasiami Jesús, “Yũre bajiro ïna quēne, Dios ï bojasere yato” yigũ.

**“Moisés rētoro ñamasugũ ñagũmi Jesús”, yire queti**

**3** **1** To bajiri, “Jesús manire ejarēmogũ ñaami”, yimasiaja mani. Manijũa, “Dios ï ejarēmose rāca Cristore ïre ajitirũ-nũroti ñaja” yimasicōari, ïre cūdirã ñaja mani. “Yũ yarã ñato” Dios ï yiriarã ñaja. Jesújũa ñagũmi, “Masare quēnaro yũ yiro-tire gotiba” Dios ï yicōarí. To bajicōari, tirũmũjũ paia çjarã ïna yisnoadimasire ïnure yigũ, Cristo quēne rojose mani yise-re “Masirioato Dios” yigũ, manire sēnibosagũ ñagũmi. To bajiri, “Ñamasugũ ñagũmi Jesús”, yitũoĩato mani. **2** **Adi macarũcũrojũre ñagũ Dios ï rotirore bajirone yigũ, Dios yarã masare quēnaro ejarēmoñumi Jesús. To bajirone yimasiñuju Moisés ñamasirí quēne. Dios ï rotirore bajirone yigũ, Dios yarãre quēnaro ejarēmomasinuju. 3-4** Quēnaro ïnare ejarēmomasirí ñaboarine, “‘Rojose mana ñaama’ Dios ï yĩarã ñato”, yimasibetimasinuju. Jesújũama, “‘Rojose mana ñaama’ Dios ï yĩarã ñato”, yimasigũ ñaami. To bajiro yigũ ï ñajare, Moisés ñamasirí rētoro Cristore rũcũbũoroti ñaja. **5** Moisés ñamasiríjũama, Dios moarimasũre bajiro bajimasiñuju. To bajicōari, Dios ï yirotiore bajirone cūdigũ, Diore ajitirũnũrã-re quēnaro ejarēmogũ ñamasinuju. To bajiro ï yimasirere tũoĩacōari, “Cristo sũori Dios manire quēnaro ï yirotiore goti-masiogũ yimasiñumi Moisés”, yimasiaja mani. **6** Cristojũama, Dios moarimasũre bajiro me bajiyuju. ï ñaami Dios macũ, ï rotirore bajirone yigũ. To bajicōari, Dios yarã çjũ ñaami Cristo. “Cristo sũori quēnaro Dios ï yirotiore yiecorũarãja mani” mani tũoĩatũjabetijama, ï yarã ñacōa ñarũgũrũarãja.

**“Diore ajitirũnu tũjabesa mua”, yire queti**

**7** To bajiri Dios yarã ñari, Cristore ajitirũnu tũjabeticōato

mani. Dios ocare masa ñna ucamasire Dios yarãre gotigu, ado bajiro yimasiñumi Espiritu Santo:

“Yucune mware yu gotisere mua ajijama, yu yirotirore bajiro cadiya.

**8-9** ‘Mure ajitirũnũmenaja yua’ yibesa. Mua ñicua yure jũnisinicõari, ñna cõdibetimasicatire bajiro bajibesa mua. Mua ñicua, masa manojũ ñna ñacudiro, jwarã masa cõro ñaricũmari ñaiañamanire ñnare yĩorũgũboacajũ yu. To yu yiboajaquẽne, yure ajirũcũbũomena ñari, ado bajise yirũgũcama ñna: ‘Mani bojasejua mani yijama, ¿no bajise manire yirojari Dios?’ yirũgũcama ñna.

**10** To bajiro ñna yisere jũnisinicõari, ado bajise ñnare yicajũ yu: ‘Yure ajiterũgũaja mua. To bajiri, “Ado bajiro tuoãgũ ñagũmi”, yure yimasibeaja mua’, ñnare yicajũ yu.

**11** Quẽna gajeye ñnare goticajũ yu: ‘Riojo mware gotiaja yu. Yu rãca quẽnaro mua ñasere bojaboacajũ yu. To bajiboarine cojoji me muajua yure mua ajibetijare, yu rãca quẽnaro ñabetiruarãma’ yicõacajũ yu”, yigotimasiñumi Dios ñ cõagũ Espiritu Santo.

**12** To bajiri mani ñicua Diore ñna ajitirũnũ tujamasiriore bajiro bajibesa yu yarã mua. Sĩgũ mani yu, “Dios ocare socase ñaja” ñ yisere ajicõari, quẽnaro ñre gotimasioña, “Masirẽtogũ Dios yere ajitirũnũ tujaromi” yirã. **13** Dios ocare gãmerã gotivariquẽnaña mua. “Maji busiyũ gãmerã gotiroti ñaroja”, yituoĩabesa, mua rãcana sĩgũri vãti ñ rotisejũare cõdicõari, “Dios oca socase ñaja’ yiroma” yirã. To bajiri tocãrãcarũmũne gãmerã goticõa ñarũgũroti ñaja mware, “Tire ajitirũnũ tujabeticõato” yirã. **14** Tirũmũju, Cristore ñre mani ajitirũnũsũocatore bajirone ñre ajitirũnũcõa ñaroti ñaja manire. To bajiro mani bajicõa ñajama, mani bajirearo berojũ õ vecajũ Cristo rãca quẽnaro ñacõa ñnarũgũrãrãja mani.

**15** Tire mware yu gotirote bajirone gotiaja Dios ocare masa ñna ucamasire:

“Yucune mware yu gotisere mua ajijama, yu yirotirore bajiro cadiya. ‘Mure ajitirũnũmenaja yua’ yibesa. Mua ñicua yure jũnisinicõari, ñna cõdibetimasica-

tire bajiro bajibesa m̄ua”, yigotiaja Dios ocare masa ñna ucamasire.

**16** Mani ñicua ñna bajimasirere t̄uoĩaña m̄ua quēna: ¿Ñimarã ñañujari Dios ñ masune ñ gotisere ajirã ñaboarine, c̄udibetiriarã? Egipto sitaju ñarãre, Moisés ñ ùmato variarãne bajiyuma.

**17-18** Juarã masa c̄oro ñaric̄umari, Diore ñna c̄udibetijare, b̄uto j̄unisiniñuju Dios. Ñnare j̄unisinic̄oari, ado bajiro ñnare yimasin̄uju Dios: “Riojo m̄uare gotiaja ȳu. Quēnari sitare m̄uare ȳu ɸjor̄uaboacatore ejabetiruarãja m̄ua”, ñnare yimasin̄uju Dios. To bajiro ñ yire ñajare, ti sitaju ejamenane, masa manoj̄u ñna ñacudimasiraroj̄une bajireacoamasin̄ujarã ñna.

**19** Tire ajic̄oari, “Diore ajir̄uc̄ub̄obetiriarã ñari, ti sitajure ejabesuma”, yimasiaja mani.

**4** **1** To bajiri mani ñicua ñna bajiriarore bajiro bajibetic̄oato mani. “Ȳu yarã, ȳu rãca quēnaro ñna ñasere bojaja ȳu” ñnare Dios ñ yiriarore bajirone yami, manire quēne. To bajiri, quēnaro gãmerã ejar̄emoto mani, “Mani jedirone, Diorãca quēnaro ñac̄oã ñar̄uḡurãsa” yirã. **2** Ñnare Dios ñ yimasiboariarore bajiro manire quēne quēnaro ñ yirotire ajicaju mani. Mani ñic̄uaj̄uama, Dios ocare ajirã ñaboarine, ñnare ñ gotiriarore bajiro ñna bajibetijare, “Toju ñaruarãja” ñ yimasiboariaroj̄ure ejabetimasin̄ujarã. **3** Manij̄uama, Diore ñre ajitir̄un̄u t̄ujabetic̄oato mani. Ñre ajitir̄un̄urã r̄ine ñarãma quēnaro ñ rãca ñarona. To bajiro ti bajijare, ado bajise ñnare gotimasin̄uju Dios, mani ñic̄uare:

“Riojo m̄uare gotiaja ȳu. M̄uare b̄uto j̄unisinic̄oari, ȳu rãca quēnaro ñabetiruarãja m̄ua”, ñnare yimasin̄uju Dios, ñre ajitir̄un̄ub̄etiriarãre.

To bajiboarine adi macar̄uc̄urore rujeoḡuj̄une, “Masa ȳu bese-rã rãca quēnaro ñar̄uc̄uja ȳu”, yit̄uoĩac̄oamasin̄uju Dios. **4** To bajiro ñ yimasirere masiaja mani, Dios ocare masa ñna ucamasire ado bajise ti gotijare:

“Adi macar̄uc̄uro ñnase jedirone rujeojeoc̄oari, cojomo c̄oro, gaje ãmo, j̄ua j̄enituarir̄um̄ure quēnaro ñac̄oamasin̄uju Dios”, yigotiaja Dios ocare masa ñna ucamasire.

**5** To bajiri, “Ȳu ñarore bajirone quēnaro ȳu rãca ñaruarãma” ñ yiboarere ñna ajitejare, ado bajiro ñnare yimasin̄uju Dios:

“¡Ȳu rãca quēnaro ñabetiruarãja m̄ua!”, yimasin̄uju.

**6** “Ȳu rãca quēnaro ñato ñna” yiḡu, Dios ñ yimasirere ajiriarã

ñaboarine, ï rãca quẽnaro ñabetimasĩñujarã ïna. To bajiboarine, masa rãca quẽnaro ï ñarotire bojacõa ñaami Dios. **7** To bajiri mani ñicua ñamasiriarã ï gotirere ajitemasiriarã bero yoatojũ David ñamasirí Diore ajicõari, ado bajiro ucamasĩñuju:

“Yucũne mũare yũ gotisere mũa ajijama, yũ yirotirote bajiro cudiya. ‘Mũre ajitirũnũmenaja yũa’ yibesa mũa”, yucamasĩñuju David ñamasirí, Dios oca tutijũ.

**8** Diore ajitemasiriarã ïna bajireajediro bero, ïna rĩa ñamasiriarã mani ñicũare ïnare ũmato vamasĩñuju Josué ñamasirí, Dios ïnare ï ñjomasiriarojũre. Tojũ quẽnaro ñamasĩñujarã ïna mani ñicua. Quẽnaro ñaboarine, Diorãca quẽnaro ïna ñabetijare, ado bajiro yimasĩñuju Dios: “Yucũne mũare yũ gotisere mũa ajijama, yũ yirotirote bajiro cudiya”, ïnare yimasĩñuju quẽna. **9** To bajiri mũare yũ gotisere ajicõari, ado bajiro ajimasirãja mũa: “Dios yarã, ï rãca quẽnaro ïna ñacõa ñarotire bojacõa ñagũmi”, yimasirãja mũa. Diorãca quẽnaro mani ñase ado bajiro bajiaja: Dios adi macarũcũrore rujeogajanocõari, quẽnaro ñacõamasĩñuju. Tire bajirone bajiroja, Diorãca quẽnaro mani ñacõa ñase quẽne. **10** Adi macarũcũro ñase jediro rujeogajanoacũ, ï bojarore bajiro ti bajirotire masicõari, quẽnaro ñacõamasĩñuju Dios. ïre bajiro quẽnaro ñarũcũmi, “Ado bajiro mũ yijama, yũ rãca quẽnaro ñarũcũja mũ” Dios ï yirotisere cãdigũ quẽne. **11** To bajiri ï rãca quẽnaro mani ñasere Dios ï bojajare, quẽnabũsaro ïre ajitirũnũto mani, “ï rãca quẽnaro ñarãsa mani” yirã. Mani ñicua Diore ajitirũnũbeticõari, ï rãca quẽnaro ïna ñabetimasiriarore bajiro bajibetiroti ñaja manire.

**12** “Dios oca ñamasuse ti ñajare, ajitirũnũcõa ñaroti ñaja”, mũare yigotiaja yũ. Masijeogu ï ñajare, “To bajiro bajirũaroja” ï oca ti yigotirote bajirone bajirũaroja ti. Jariase jũajacatũajũne bũjariase mani mũsũjũ ti ejarore bajiro bajiaja Dios oca, mani ajise. To bajiri, mani tũoĩase, “Masibecũmi Dios” mani yiboasere quẽne ïamasigũ ñaami Dios. ï oca sũorine, “Rojose ñaja; quẽnase ñaja”, yitũoĩamasiaja mani. **13** Disejũa Dios ï rujeorerere ïre yayiomasiña manoja. To bajiri, disejũane mani yise, mani tũoĩase quẽne, ï masibeti manoja. ï ñagũmi, ñajediro mani yisere mani gotirotũ.



**“Paia ɥju rêtoro ñamasugũ ñagũmi Cristo”, yire queti**

**14** Cristo, paia ɥju rêtoro ñamasugũ ñagũmi. Dios macu ñari, i tɥju manire ñagõbosagu ñagũmi. To bajiri, ïre ajitirũnu tɥjabeticõato mani. **15** “Cristo adi macarucuroju i ñaro, Dios i bojabetire yato” yigu, manire i yicoderũgũrore bajiro Cristore quẽne rojosere ïre yiotirũgũboayuju Satanás. To bajiboarine rojose yibesuju Cristo. “Yũre quẽne rojose yiotirũgũcami Satanás; ñnare quẽne to bajirone yami” yimasigũ ñari, “Dios i bojarore bajiro ñna yirũaboase ñnare josaja ti” yigu, manire ñamaicõa ñagũmi. Manire ñamaicõari, paia ɥju rêtoro ñamasugũ ñari, “‘Mũre ajitirũnu tɥjabeticõato ñna’ yigu, ñnare ejarẽmoña”, i jacũre manire yisẽnibosarũgũgũmi. **16** To bajiri mani quẽne, Diore güimenane, sẽniroti ñaja. ïre mani sẽnijama, rojose mani yise vaja rojose manire i yiborotire manire ñamaicõari, yibetirucumi. No bojarijũne i ejarẽmosere mani bojajama, quẽnaro manire ejarẽmorucumi.

**5** **1** Mani ñicua ñna ñarirodore ñamasiñuju paia ɥju ñamasugũ, Dios i beserí, “Masare ejarẽmoato” yigu, i cürí. Ado bajiro yirũgũmasiñuju: Vaibucurã ïre ñna ñisere quẽne boca juacõari, soemũobosarũgũñuju, rojose ñna yisere “ñnare masirioya mũ” ñnare yisẽnibosagu. **2** ï quẽne, manire bajirone bajigu i ñajare, Dios i rotise yimasijeogu me ñamasiñuju i. “Yũre quẽne josaja” yitũoĩagũ ñari, “Gãjerã Diore ajitirũnrãre, to bajirone bajiroja”, yĩamaiñuju. **3** Manire bajirone rojose yigu ñari, “Rojose yũ yise vaja yũre masirioato Dios” yigu, gãjerãre i sẽnibosaroto rĩjoro, i quẽne vaibucũ rii soemũogũgũñuju. **4** Nijũane, “Yũ ñagũsa paia ɥju”, yibetimasinju. Gãjerã quẽne, “ĩ ñato”, yibesujarã. Dios sigũne, “Mũ ñarucuja paia ɥju ñamasugũ”, yimasigũ ñamasiñuju i. To bajiri, Aarón ñamasiríre, “Paia ɥju ñaña”, ïre yicũsũomasiñuju Dios. **5** To bajirone ïre yiyumi Jesucristore quẽne. Diore ïre cũñumi. To bajiri ado bajise ïre i gotirotire ucamasiñuma masa:

“Adirũmũne yũ macũ ñari, yũre bajiro rotisũorucuja mũ’ yami Dios”, yucamasiñuma ñna, Cristore, Dios i gotirotire yirã.

**6** Gajeye i macũre i gotirotire ado bajise yucamasiñuma ñna:  
 ““Masa rojose ñna yisere ñnare masirioya” ñnare yisẽ-

nibosagu ñarucuja mu' mure yaja yu. 'Paia uju ñamasugũ Melquisedec i bajicatore bajiro bajirucuja mu' mure yaja yu", yucamasiñuma ina, i macure Dios gotirotire yirã.

**7** Cristo, manire bajiro rujũ caticõari, adigodoju ñagũ i bajiro-caroto rjoro, Diore bũto sãnirũgũñuju i. Otiãne, ado bajise jacase sãnĩñuju i: "Cacu, 'Yũre sãabeticõato ina' yigu, yũre ejarẽmoña. To bajiboarine, mu bojarore bajirone bajirucaroja", yiyuju Cristo, i jacure. I rotirore bajiro yigu i ñajare, ire ajicõari, "Yũ bojarore bajirone bajiato" yigu, ire ejarẽmoñuju Dios. **8** Dios macu ñaboarine, rojose tãmũoñumi Cristo. "Rojose tãmũoboarine, Diore cudicõa ñaroti ñaja", yitũoĩañuju. To bajiro bajica yigu, ñajediro Dios i rotirore bajirone yiyuju Cristo. **9** I rotirore bajirone i cudijeocõajare, "Mu sũori ina rijato berõju, mu rãca ñacõa ñarũgũrũarãma ina, mure ajitirũnũrã", ire yiyuju Dios. **10** To bajiri, "Paia uju ñamasugũ Melquisedec ñamasiri i bajicatore bajiro bajirucuja mu" Dios i yiri ñagũmi Cristo.

**"Jesucristore ajitirũnu tũjabetiroti ñaja", yire queti**

**11** "Tirũmũju paia ujarã ina yisũoadimasire ùnire yigu ñaami Cristo" yu yigotirẽmũaboase jairo ruyaja maji. Tire ajimasijeomenaja mũa, bũto mũare ti josajare. **12** Tirũmũju, Cristore ire ajitirũnũsũocaju mũa. To bajiri tire quẽnaro buecõari, bũtobusa i bojarore bajiro mũa yirũtu vajama, jẽre i ocare masare gotimasiocoarona ñaja mũa. To bajiboarine, "Maji, josabetijũare yũare gotimasiocõa ñaña" yitũoĩarãre bajiro bajiaja mũa. **13** Rĩamasa ùjurãcare bajiro ñaja mũa. To bajiro bajirã ñari, "Quẽnase ñaja; rojose ñaja" ina yimasibetore bajiro bajirã ñaja mũa. **14** Rĩamasare bajiro me bajiaama bũcũacoanajũama. Tũoĩamasicoana ñari, "Quẽnase ñaja; rojose ñaja" yitũoĩamasicõari, Dios i bojarore bajiro yirã ñaama.

**6** **1** To bajiri Cristo oca ñamasuse ti ñajare, "Yũ gotisere ajimasiriario maja mũa" yu yisere gotiguagu yaja, Dios i bojarore bajiro mũa yiotire yigu. Jẽre Cristo oca josabetibũsasere masiaja mani. Adi ñaja Cristo ye mani buesũocati: "Rojose yitũjacõari, quẽnasejũare yitũoĩaroti ñaja manire" yirere buecaju mani. "Diore mani ajitirũnũbetijama, rojose tãmũotũja-

betiriaroju varnarāja mani” yirere quēne buecaju mani. **2** Gajeye ado bajiro buecaju mani: “Cristore ajitirūnrā űaja yu” yirāre oco rāca űna bautizasere quēne buecaju mani. To yicōari, “Espiritu Santo, m̱a rāca űaruc̱mi” yirā, űnare űna āmo űujeosere quēne buecaju mani. Quēna gajeye ado bajise buecaju mani: “Cristore ajitirūnrā, bajireacoaboarine, tudicaticōaruarāma” yirere quēne buecaju mani. To yicōari, masare Dios ű beserotire quēne buecaju mani. **3** Ti űacaju Dios oca josabetibus̱a mani bues̱ocati. To bajiri, josasere quēne buemasicōari, butoḇsa ű bojarore bajiro yirūtuajaro mani, Dios ű bojajama.

**4-6** Sīgūri Dios ocare ajitirūnrā űarāma maji. To bajicōari, Espiritu Santore c̱orā űarāma. To yicōari, Dios ű bojasere yirā űarāma. Dios ű masise rāca űaűaűamanire yīoecoriarā quēne űarāma. To bajiro yirā űaboarine, űna ajitirūnu ṯajajama, juaji ajitirūnubetiruarāma. To bajiro űna bajijama, Jesucristore űatecōari, yucūtēroju űre jajaturiarā űnane űarā bajirāma űna. To bajiro űna bajijare, gājerā quēne Dios ocare ajirūc̱uḇobeticōari, ajarāma. **7** “Dios ocare ajicōari, quēnaro ote vāṉuri sitare bajiro bajijaja mani” yigu, ado bajise m̱are gotiaja yu: Vese ote űarivesere oco ti quedi-ro bero ote quēnaro ti vāṉore bajiro bajiroti űaja manire. To bajicōari, ti sitajare ote vāṉcōari, quēnaro ti rica c̱tijama, variquēnagūmi ti vese uju. To bajiri, ote rica c̱ti vese ű űavariquēnarore bajiro manire quēne űavariquēnagūmi Dios, ű ocare ajicōari, ű bojarore bajiro mani yijama. **8** To bajicōari, gajejuma vese yiriaju sita quēnabeto űari, oco ti quediboajaquēne, ote vāṉbetone, vidise rīne ti judijama, “Sita quēnabeto űaja” yigu, tire soe-reacōagūmi ti vese uju. Tire bajirone Dios ocare ajiboarine, ajitirūnu ṯjacōari, ű bojabetire űna yijama, rojose tām̱oṯjabetiriaroju űnare reacōaruc̱mi Dios.

**“Yure yirētobosaruc̱mi Cristo’ mani yiṯoīacōa űajama, quēnaja”, yire queti**

**9** “Ado bajiro bajirāma Cristore ajitirūnu ṯjarā” m̱are yu yigotimasiosere, “M̱ane űaja Diore ajitirūnu ṯjarona” yigu me yaja yu. Quēnaro m̱a yirere ajicōari, “Jesucristo s̱ori Dios yarā űarāma”, m̱are yaja yu. To bajiro m̱are yimasicōari, “Butoḇsa Dios ű bojarore bajiro yirūtu varnarāma űna”,

mware yaja yu. **10** Quēnaro riojo yigu ñaami Dios. To bajiro yigu ñari, i bojarore bajiro quēnaro mwa yirere masiritibetirucumi. To bajiri, gājerā Dios yarāre mwa ejarēmorere ajicōari, “Diore rūcubwōrā ñarāma”, mware yimasiaja yu. Īnare ejarēmocōa ñarāja mwa maji. Tire quēne masiritibetirucumi Dios. **11** To bajiro quēnaro mwa yirūgūse quēnaja ti. Variquēnase rāca Dios ocare ajitirūnu tujamenane, ñajediro quēnaro mwa yirūgūrore bajirone gāmerā yicōa ñarūgūroti ñaja. To bajiro mwa yicōa ñajama, “Cristo swori quēnaro manire yirucumi Dios” mwa yitwoīarore bajirone mware yirucumi. **12** Dios ocare ajiterāre bajiro mwa bajisere bojabeaja yu. To bajiri, “Bajiruaroja” ĩnare i yirere ajitirūnu tujabetiriarāre bajirojwa bajiya mwa quēne. Īnare bajiro mwa bajijama, mware i gotiriarore bajirone mware quēne yirucumi Dios.

**13-14** Abraham ñamasirī i bajimasirere tuoīaña mwa. “Gāji yure bajiro yigu magūmi” yitwoīagū ñari, ado bajiro ĩre gotimasiñuju Dios: “Mure socabeaja yu. Jājarā jānerabatia cutirucumi’ mure yaja yu”, ĩre yimasiñuju Dios, Abraham ñamasirīre gotigu. **15** “Ī yirore bajirone yigu ñaami Dios” yigu ñari, “Socu yigumi” yitwoīarejaibetimasiñuju Abraham, Dios i yiro-tire yugu. To bajiri, Dios socabecu i ñajare, “To bajiro bajiruaroja” Abrahamre i yimasiriarore bajirone bajimasiñuju ti. **16** To bajiri, maniñama, “‘Socu me yigumi’ gājerā yiajiato” yirā, masa rētoro ñamasugū Dios vāme rāca yirūgūrāma. To bajise ĩna yijama, “Socu me yaja. Dios quēne masigūmi”, yirūgūama. To bajiro ĩna yisere ajicōari, “Socarā me yama”, yitwoīarāma masa. **17** To bajiri, “‘Socu me yigumi Dios. Ī yirore bajirone yigu ñagūmi’ Abraham yure yiajiato” yigu, “Mure socabeaja yu”, yimasiñuju Dios. **18** Socagu me ñaami. “Yirucuja” i yirore bajirone yigu ñaami Dios. To bajiro yigu i ñajare, rojose tāmnotujabetiriaroju mani vaborotire manire yirētobosacōari, “‘Quēnaro ĩnare yirucuja’ i yiriarore bajirone manire yirucumi”, yitwoīaja mani. **19-20** To bajiro manire Dios i yire ti ñajare, i gotiriarore bajiro ti bajiro-tire tuoīacōa ñato mani. Diore yirūcubwōriavi yotoriario vajajwa Dios i ñarisōajure jājaecōari, “Rojose ĩna yisere ĩnare masirioya” yisēnibosarimasa ñamasīñujarā paia çjarā. To bajiri, Cristo quēne, ĩna yimasiriarore bajiro yigu, o vecaju Dios i ñaroju eja-cōari, “Rojose ĩna yisere ĩnare masirioya”, manire yisēnibosa

ñagũmi. Paia ɥɟũ ñamasugũ Melquisedec ĩ yimasiriarore bajirone yigũ, Cristo quẽne, manire sãnibosacõa ñarucũmi. Manire ĩ sãnibosa ñajare, “Dios ĩ yiriarore bajirone quẽnaro manire yirucũmi”, yimasiaja mani.

**“Aarón ñamasirí rẽtoro quẽnaro manire yibosagumi Cristo”,  
yire queti**

**7** 1 Melquisedec, Salem macana ɥɟũ ñamasiñuju. To bajicõari, pai ñamasiñuju. Ñajediro ɥɟure Diore rũcubũogũ ñamasiñuju. Mani ñicu Abraham ñamasirí gaje macariana ɥjarãre sãareacõari, ĩ ya macajuare tudiamasiñuju ĩ. To bajiri ĩ tudia-do, ĩre bocagũ, vamasiniuju Melquisedec. ĩre bocacõari, ĩre sãnibosamasiñuju, “Quẽnaro ĩre yato Dios” yigũ. 2 To ĩ yiro bero, gaje macariana ɥjarãre sãareacõari, ĩna ye gajeyeũni ñaboare ĩna juarere, juaãmo cõro ñaritutuari yicũcõari, cojotubua Melquisedec ñamasiríre ĩsimasiñuju Abraham. “Melquisedec” ti yijama, “Ɛɟũ quẽnase rĩne yigũ” yire ũni ñañuju ti. Salem macana ɥɟũ ñamasiñuju Melquisedec. “Salem” ti yijama, “Quẽnaro ñariamaca” yire ũni ñañuju. To bajiri, “‘Quẽnaro gãmerã yĩnato mani’ yigũ ñamasiñuju Melquisedec”, yimasiaja mani. 3 Melquisedec jacua, ĩ yarã quẽne, to yicõari, ĩ ruyuarere, ĩ bajirocarere quẽne ucare ti maniboajaquẽne, “Pai ñamasiñuju Melquisedec”, yigotiaja Dios ocare masa ĩna ucamasire. To bajise yiucare ti maniboajaquẽne, “Diore sãnitujabetirimi”, yaja mani. To bajirone bajiami Cristo quẽne. “‘ĩnare ejarẽmoña’ manire yisãnibosa tujabecũmi”, yimasiaja mani.

4 Abraham ñamasirí ñamasugũ ĩ ñaboajaquẽne, ĩ rẽtoro ñamasugũ ñamasiñuju Melquisedec. Gaje macariana ɥjarãre sãareacõari, ĩna ye gajeyeũni ñaboare ĩna juarere, juaãmo cõro ñaritutuari yicũcõari, cojotubua Melquisedec ñamasiríre ĩsimasiñuju Abraham.<sup>b</sup> 5 Abraham ĩ bajirocaro bero, gajerodojũ, “Paia ñaruarãma ĩna Abraham jãnami Leví vãme cutigũ jãnerabatia”, ĩnare yicũmasiñuju Dios. To bajiri, “Sĩgũ jãnerabatia ñaboarine, ĩna cõsere, juaãmo cõro ñaritutuari

<sup>b</sup>7.4 “Gãjerã ĩna ĩsiserẽ boca juarã, ĩsirã rẽtoro ñamasurã ñaama”, yitũoĩañujarã hebreo masa.

yicūcōari, cojotubua ñna yu Leví ya jūnanare paiare ñsiruarāma ñna”, ñnare yimasiñuju ĩ. **6** Leví cūti jūnagu me ñaboarine, Melquisedec quēne, Abraham ĩ ñisere boca juamasiñuju ĩ. Abraham ñamasiríre, “Mu suorine adi macarucuroana ñajedirore quēnaro yirucuja yu”, yimasiñuju Dios. To bajiro ĩ yirí ĩ ñaboajaquēne, Melquisedecjua ñamasíñuju, “Quēnaro mre yato Dios” Abrahamre yisēnibosagu. **7** To bajiri, “‘Quēnaro mre yato Dios’ yigujua ñaami ñamasugū”, yimasiaja mani. Tire masirā ñari, “Abraham rētoro ñamasugū ñamasíñuju Melquisedec”, yimasiaja mani. **8** Gajeyere quēne tuoñaña ma. Adirūmari ñarā paia, Leví jānerabatia, manire bajirone bajirearuarāma ñna quēne. Melquisedecjua rema, “To cōro bajirocamasiñuju”, yigotibeaja Dios ocare masa ñna ucamasire. To bajiri, “Bajirocabetirimi”, yicōaja mani. **9-10** Abraham ñamasirí, Melquisedere ĩ ñsirone, ĩ jānerabatia quēne beroju ruyuarona ñari, ñna quēne ĩre ñsirāre bajiro yimasiñujarā. To bajiri Leví cūti jūnana quēne, Abraham jānerabatia ñari, Melquisedere ĩ ñsirone, ñna quēne ñsimasiñujarā. To bajiri, “Leví cūtijūnana rētoro ñamasugū ñamasíñumi Melquisedec”, yimasiaja mani.

**11** “Leví jānerabatia ñnaruarāma paia”, yimasiñuju Dios. Sīgū Leví jānami ñamasíñuju Aarón vāme cūtigu, paia ujū ñamasugū, Dios ĩ cūsuomasirí. To bajiri Aarón, Leví jānami ĩ ñajare, “Aarón rētoro ñamasugū ñamasíñuju Melquisedec”, yimasiaja mani. Leví jānami Aarón, ñna jānerabatia quēne, Diore rūcuborā masa ñna ñisere ñnare yibosarimasa ñnacoadimasiñujarā ñna. Tire boca juacōari, Diore rūcuborā tire soemomasíñujarā ñna. “Rojose ñna yise vaja, rojose ñnare yibesa” masare yisēnibosarimasa ñnacoadimasiñujarā. To bajiro ñna yiboajaquēne, Diojua ĩ ñajama, rojose ñna yire ti ñacōajare, “Rojose mana ñaama”, ñnare yīābetimasiñuju Dios. To bajiro ti bajijare, paia ujū ñamasugū Melquisedere bajiro bajigure, ĩ macure cōañumi Dios, “Masare yirētosato” yigu. **12** ĩre ĩ cōaro bero, “Masa rojose ñna yise vaja, rojose ñnare yibesa” yibosarimasa bojabesuju Dios. To yicōari, Moisére ĩ roticūmasirere ñna yiboarere quēne bojabesuju. **13-14** Adigodoju manire bajiro rujū cūticōari ruyuyuju mani ujū Cristo, Judá ñamasirí cūtijūnagu. To bajiboarine, Judá jānerabatiarema “Paia ñabetiruarāma”, yimasiñuju Moisés ñamasirí. To bajiri,

Cristo r̄joroj̄re Judá jānerabatiana, s̄gũj̄ane paia ñabeti-masiñujarā.

**15-16** To bajiri, “Leví jānerabatia r̄ine paia ñaruarāma” Dios ī yimasire yigũ me, paia ɸjũ Melquisedere bajiro bajiyumi Cristo. Tudicaticōari, rijabetirocũ ñari, bajiyumi. To bajiro bajirocũ ñari, “Paia ɸjũ ñamasugũ Melquisedere bajiro bajiyumi Cristo”, yimasijaia mani. **17** Dios ī macũre ado bajiro ī gotirotire masa ñna ucamasire ti ñajare, “Paia ɸjũ ñamasugũ Melquisedere bajiro bajicōa ñarucũmi Cristo”, ĩre yimasijaia mani:

““Rojose ñna yisere ĩnare masirioya”, ĩnare yisēnibosa tujabetirocũ ñaja mũ’ mũre yaja yũ. ‘Paia ɸjũ ñamasugũ Melquisedec ī bajimasicatore bajiro bajiñarucuja mũ’ ĩre yigotiyumi Dios, ī macũre”, yaja ti Dios ocare masa ñna ucamasire.

**18** Dios, Moisére ī roticũmasiriaro cōrone ñna cudijeocōaboa-jaquēne, “Rojose mana ñaama”, ĩnare yī̄abetiborimi Dios. To bajiri Moisére Dios ī roticũmasire, vaja manire bajiro bajiyuja ti. **19** To bajiro ti bajijare, Moisére ī roticũmasire vasoayuju Dios. Mame ī vasoarejũama, ado bajiro bajiaja: Manire Cristo ī rijabosare suorine, “‘Rojose mana ñaama’ manire yī̄agũmi Dios” yimasirā ñari, variquēnase rāca ĩre sēnirũgũaja mani. To bajiro ti bajijare, “Tirũmũaye Moisére Dios ī roticũmasire rētoro quēnase ñaja adirodoriae”, yimasijaia mani.

**20-21** To bajiri, ī macũ Cristore, “Paia ɸjarā rētoro ñamasugũ ñarucuja mũ” yigũ, ado bajiro ĩre yiyuju:

“‘Mũre socabeaja yũ. “Rojose ñna yisere ĩnare masirioya”, ĩnare yisēnibosa tujabetirocũ ñaja mũ’, mũre yaja yũ”, ĩre yiyuju Dios, ī macũre.


Gājerārema “Paia ɸjarā ñaruarāja mũa” yigũ ñaboarine, ti ũnire yibetimasīñuju Dios. **22** Tire mani ajijama, “Jesucristo suorine Dios ī gotiriarore bajirone quēnaro manire yirucũmi”, yimasijaia mani. **23** Tirũmũaye Moisére Dios ī roticũmasire r̄ucũbuorā, jājarā paia ñamasīñujarā. To bajicōari, ñna bajireajaquēne, ĩnare moavasoarona jājarā ñarũgũmasīñujarā. **24** To bajiboarine, Cristojũrema, tudirijabetirocũ ī ñajare, “ĩre moavasoarocũ magũmi”, yimasijaia mani. **25** “Jesucristo suorine Diore ajitirũnrāre, rojose ñna yisere ‘Masirioato Dios’ yigũ, Dios ī ñarojũ, ĩnare sēnibosacōa ñarũgũgũmi, tudirijabetirocũ ñari”, yimasijaia mani.

**26** To bajiri tirũmũju paia ɸjarã ãna yisuoadimasire ũnire yigũ, Cristo quẽne rojose mani yisere “Masirioato Dios”, manire yisẽnibosarũgũgũ ñagũmi. Cristo ñañumi masa rojose ãna yirore bajiro yibecu. Quẽnase rĩne yigũ ñañumi. To bajiro bajirĩ ã ñajare, Dios ã ñaroju, “Rẽtoro ñamasugũ ñarũcũja mu” Dios ã yirĩ ñagũmi. **27** Paia ɸjarã ñamasurã ãna yimasiriarore bajiro yigũ me ñagũmi Cristo. Ñajũama, tocãrãcarũmũne vai-bũcũrãre sãacõari, soemũomasĩũjuarã, “Rojose yũa yisere masirioya” Diore yirã. To yicõari, ãna yarãre quẽne rojose ãna yirere “Ñare masirioya Dios”, ãnare yisẽnibosarũgũmasĩũjuarã ãna. To bajiboarine, Jesũũama, mani jedirorene cojojine rijabosayumi, rojose mani yisere “Masirioato Dios” yigũ. **28** Moisẽre Dios ã roticũmasire, “Paia ɸjarã ñamasurã ñarũarãma” ã yire ti ñaboajaquẽne, manire bajirone ãna quẽne tire cãdijeobetiriarã ãna ñajare, “Rojose mana ñaama”, yĩĩabetimasiũju Dios. To bajiboarine ã macũjuarema, quẽnase rĩne yirĩ ã ñajare, “Rojose ãna yisere masirioya mu’ ãnare yisẽnibosacõa ñarũgũrocu ñaja mu”, ãre yiyuju.

**“Cristo, õ vecaju manire sãnibosa ñagũmi”, yire queti**

**8** **1** “To bajirone bajigũmi Cristo, õ vecaju Diorãca ã rotiñarorũ”, mũare yaja yũ. **2** Tojũre ejacõari, “Rojose mani yisere masirioya”, manire yibosa ñagũmi Cristo, Dios ã bũariavijũre.

**3** Tocãrãcu paia ɸjarã ñamasurã ado bajiro yiyuma: Rojose masa ãna yisere, “Ñare masirioya Dios”, yisẽnibosayujarã ãna. To yicõari, Diore rũcũbũorã masa ãna ãsisere boca juacõari, ãnare yibosayujarã. To bajiro ãna yire ũnirene yigũ, Cristojũama, manire rijabosayumi, rojose mani yisere manire yirẽtobosagũ. **4** Yucũri ñarã paia, Moisẽre Dios ã roticũmasiriarore



*Hebreos 8.5*



bajirone yicōa ñarāma. To bajiri Cristo, adigodojũ ã ñacōajama, ñare bajiro yibecũ ã ñajare, “Pai me ñaami”, ñre yiborāja mani. To bajiboarine, õ vecajũ Dios ã ñarojũ, “‘Rojose ña yisere masirioya’ manire yibosagũ ñagũmi”, yimasijaja mani. **5** “Mani rāca ñagũmi Dios” masa ña yirũcũbũorotivire Moisés ñamasirí ã bũarotiroto rĩjoro, ado bajiro ñre yimasĩnumi Dios: “Gũtaũ joejũ mũre yũ ïocativire bajirivine bũarotiya”, yimasĩñuju Dios, Moisés ñamasiríre. To bajiri, “Mani rāca ñagũmi Dios” masa ña yirũcũbũorivire ña bũajama, Moisére Dios ã ïomasirivire bajirivine bũamasiñujarã. **6** Paia ƚjarã ñamasurã Dios ã rotimasire cũdimasiriarã ña yirũgũmasire rētoro quēnaro manire yibosarũgũgũmi Cristo. To bajiri, “‘Quēnaro mũare yirũcũja yũ’ Moisére Dios ã yicũmasire rētoro quēnase ñaja adirodoriaye”, yimasijaja mani.

**7** Moisére Dios ã yicũmasire rēmojũne quēnase ti ñacōajama, gajeye mamejũare vasoabetiborimi Dios. **8** Moisére Dios roticũmasire masa ña cũdijeobetijare, ãvari quēnabetimasiñuju Dios. To bajiri, “Ado bajiro ñare gotiya”, yimasĩñuju ã:

“Mani ƚjũ Dios, ado bajiro mũare gotiami: ‘Quēnaro ajiya mũa. Cojorũmũ mame mũare vasoabosarũcũja yũ, Israel vãme cũiti sitanare, Judã vãme cũiti sitanare’, mũare yami.

**9** ‘Egipto sitajũ ñarãre Israel sitajũa ñare ãmato vacũ, quēnaro ñare gotiboacajũ yũ. To bajiboarine, yũ yicatore bajiro ña cũdibetijare, “Yũ yarã me ñaama”, ñare yicajũ yũ. To bajiri, mame yũ vasoarotijũama, mũa ñicũare yũ gotimasicatore bajiro me bajirũaroja’ mũare yami Dios mani ƚjũ.

**10** ‘To bajiri, Israel ñamasirí jãnerabatiare mame yũ vasoaroti, ado bajiro bajirũaroja: “Yũ masise sũorine yũ rotisere tũoĩamasirũarãma”, ñare yirũcũja yũ. To bajiro yũ yisere bojarã ñari, quēnaro yirũgũrũarãma. To yicōari, yũ sĩgũne ña ƚjũ ña yirũcũbũogũ ñarũcũja yũ. To bajiri ñajũa quēne yũ yarã ñarũarãma’ mũare yami Dios.

**11** ‘Yũ yarã ñari, rĩamasa quēne, bũcũrã quēne, ña ñaro cōrone, yũre masijedicoarũarãma ña. To bajiri, “Ado bajiro tũoĩagũ ñaami Dios”, gãmerã yimasiorã manirũarãma’, mũare yami Dios.

**12** ‘Īnare ĩamaicōari, rojose ĩna yisere yu masiriojama, “Rojose yiriarā ũaama”, juaji ĩnare yituoĭabetirucuja yu. To bajiro ĩnare yu yiroti ti ũajare, yure quēnaro masiruarāma ĩna’ mware yami Dios”, yimasiñuju, Diore gotirētobosamasirí.


**13** “Mame oca quēnase vasoarucuja” Dios ĩ yijama, tirũmũju ĩ yimasiboarere reagu yigumi. To bajiri, “Tirũmũayejuma vaja manoja”, yimasiaja mani.

**“Cristo, quēnaro manire yibosagumi” yire queti**

**9 1** “Adigodoju ũarā yure rucubhorā mwa rējarotivire mwa buasere bojaja yu”, Moisés ũamasiríre ĩre yimasiñuju Dios. **2** To bajiri ĩ rotiriavire bajirone buamasiñujarā ĩna. Ti vi gudarecore sudirone yotoriavi ũamasiniuju. To bajiri, ejasuoriasōa Diore rucubhoriasōa vāme cutimasiñuju. Tisōaju sĭabusuoriabajari jeoriaju ũamasiniuju ti. To yicōari, Diore ĩsiroti pan jesariju quēne ũamasiniuju. **3** Gajesōa, Dios ĩ ũarisōa vāme cutimasiñuju. **4** Tisōajure, ũamasiniuju Diore rucubhorā, ĩna soejama, quēnaro sutiquēnase soemhoriaju. “Dios ĩ ũari sōagaju ũaja” ĩna yiboajaquēne, ejasuoriasōajurene ũacōamasiñuju ti. To bajicōari, Dios ĩ ũarisōajure ũamasiniuju rujajata orone ĩna quēnorijata. “Dios ĩ rotirere cūdiroti ũaja” yirā, ĩna quēnorijata ũamasiniuju. Tijatajure adocārāca vāme sãnamasiñuju: Orone ĩna quēnoría sotu sãnamasiñuju. Ti sotujure bare maná vāme cuti Dios ĩ cōare sãnamasiñuju. To bajicōari, Aarón ĩ tuemasirí quēne ācatuarí sãnamasiñuju. To bajicōari, juajai gũtajai Dios ĩ rotimasire ĩ ucamasirijairi quēne sãnamasiñuju. **5** Tijata joere rügōmasiñujarā Diorācana vurā querubines vāme cutirāre bajirā masa ĩna quēnomasiriarā. ĩna ũamasiniujarā, “Adiju ũaja masa rojose ĩna yisere Dios ĩ masirioriju” yigotirā. ĩna querujuri rāca gāmerā ũucānamucōari, rügōmasiñujarā ĩna. Yucurema ti viaye buto gotire maja ti.

**6** To bajiboarine, Diore rucubhoroti ti ũajedicōajare, tocārācũmũne Diore rucubhorā sãjaejarügũmasiñujarā paia, ũasuorisōare. **7** Paia juju ũamasugũ rĩne jãjarügũmasiñuju, Dios ĩ ũarisōa vāme cuti sōajure. Tocārāca cũmare cojojine jãjamasiñuju. Jãjacōari, ĩ masu rojose ĩ yirügũrere, to yicōari, ĩ ũarimacana, “Rojose yirā yaja yua” yituoĭamenane, “Rojose

yua yirügürere masiriobosato Dios” yigü, vaibucurã riire jua-jãjarügümasiñuju. **8** “Paia çjü ñamasugü rñe Dios ñ ñarisõare jãjamasiami”, yimasiñujarã. Tire ñna tñoajama, Espiritu Santo ñ ejarẽmose rãca, ado bajirojua yimasiñujarã ñna: “Mani masune rojose mani yisere yuare masirioya’, Diore yimasibeaja. ‘Paia çjü ñamasugü rñe manire sãnibosagü ñaami’ yimasijaia mani. To bajiro rñe bajicõa ñaruarãja mani maji. Dios manire ñ sãjarotiri-



*Hebreos 9.5*

rãmü ti ejarojü tisõare jãjaruarãja mani”, yimasiñujarã ñna. **9** “Mani ñicua Dios ñ rotimasirere ñna ajitirũnũrügümasire rẽtoro quẽnamasuse ñaja’ mani yituoãmasirotire yiro bajiyuja”, yimasijaia mani. “Mani ñicua, tirũmũjü ñna yirügümasiria-  
 rore bajirone mani quẽne, rojose mani yisere, ‘Manire masirioato Dios’ yirã, paire mani soemũroticõa ñajama, Diojua ñ ñajama, ‘Rojose maja ñnare’ manire yĩabeticõa ñagũmi”, yimasijaia mani. **10** Tirũmũaye Dios ñ rotimasire ado bajiro bajiyuja: “Adocãrãca vãme baruarãja mũa. Gajeyerema babetiruarãja mũa”, ñnare yimasiñumi. To yicõari, ñna idiotire, ñna guarotire, ñna ãmo coerotire quẽne to bajirone yimasiñumi. To bajiro ñ yijama, ti ñajediro ñ rotimasire mamejua ñ vasoaroto rĩjororema, ñna rujure ñna ñatirũnũroti rñe yigü yiyumi Dios.

**11** To bajiro ñ yimasire ti ñajare, yucũrema, “Cristo sũorine quẽnaro yirucũja yũ” Dios ñ yiriarodo ejayuja ti. To bajiro ñ yire ñajare, Cristo manire rijabosacõari, õ vecajü Dios ya vijü ñagü vasuju. Ti vijü ñacõari, paia çjü ñamasugü ñ sãnibosarore bajiro, “Quẽnaro ñato ñna” yigü, manire sãnibosa ñagũmi. To bajiro ñ yĩnarivima, adigodo ñarã Diore rũcũbũorã ñna bũariavi rẽtoro quẽnarivi ñaroja. **12** To bajiri Dios ñ ñarisõajü jãjacõari, cabra rĩa rií, ta vecu rĩa rií adigodojü ñarã paia çjarã Diore ñna ñsiriare bajiro yirü me, ñjũama, ñ rujü rise sũorine rojose mani yire vajare cojojine yirẽtobosajeocõarü, õ

vecajũ Dios ĩ ñarisõajũ jãjasuju Cristo. **13** Ado bajiro gotiaja Dios ĩ rotimasire: “Bajirocarĩre moaĩabetiruarãja mũa. To yicõari, ‘Babetiruarãja mũa’ yũ yisere quẽne moaĩabetiruarãja. To bajiro yũ yisere mũa cudibetijama, yũre ĩna rũcũbuori-vire sãjabetiruarãja mũa. To bajiboarine, ta vecũ macũre ĩna soese rĩtire, oco rãca abavũore ñasere mũare yayeturũcũmi pai. Tire ĩ yibetijama, hisopo vãme cuti rũju rãca vaibũcũ riĩne mũare vẽjabate gurũcũmi. To bajiro mũare ĩ yijama, yũre rũcũbuoriavire sãjamasiruarãja mũa”, yimasĩnumi Dios. **14** “Vaibũcũrã riĩne mũare ĩ yayeguojama yũre rũcũbuoriavire sãjamasiruarãja mũa” Dios ĩ yimasire ti ñaboajaquẽne, “Cristo manire ĩ rijabosarejũa rẽtoro quẽnase ñaũuja”, yimasiaja mani. Rojose yibetirĩ ñari, to bajiro bajiyumi Cristo. Espĩritu Santo ñacõa ñarũgũrocũ ĩ ejarẽmojare. Cristo manire ĩ rijabosare suorine, rojose mani yisere masirioğũmi Dios. To bajiri, “Rojose maja manire”, yitũoĩaja mani. To bajiro yitũoĩacõari, ñacõa ñarũgũrocũ Dios ĩ bojarore bajiro quẽnaro yirũgũroti ñaja manire.

**15** “‘Mame mũare vasoarũcũja yũ’ ĩ yiriarore bajirone bajiato” yigũ, adi macarũcũrojũre Cristore cõañumi Dios. To bajiro ĩ yicõarĩ ñari, tirũmũaye ajirũcũbuoriarãre quẽne rojose mani yisere “Masirioato Dios” yigũ, manire rijabosayumi Cristo. To bajicõari, ĩ rijabosare suorine “Yũ yarã ñaama” Dios manire ĩ yĩĩarotire yigũ, bajiyumi. To bajiro ĩ bajibosariarã mani ñajare, “Quẽnaro yirũcũja” Dios ĩ yiriarore bajirone yigũ, mani rijato berojũ ĩ rãca mani caticõa ñarotire ĩsiecorona ñaja mani. **16** Ado bajise tũoĩaña mũa: Mani yũ, ĩ bajiyayiroto rĩjoro, “Ĩne ñaami yũ ye gajeyeũni cũosũyarocũ”, yigũmi. To bajiro ĩ yirĩ ñari, ĩ bajirocato bero, ĩ yere cũosũyagũmi. **17** ĩ caticõa ñajama, ĩ masune cũocõa ñagũmi maji. ĩ rijato bero, tire cũomasigũmi gãjijũa. To bajiri, “Ĩ gotiriarore bajirone bajiaja”, yimasire ñaja. **18** To bajirone bajimasiũuju, “Quẽnaro yirũcũja yũ” Dios ĩ yimasirere quẽne. “Dios manire ĩ gotiriarore bajirone yato” yirã, vaibũcũrãre sĩamasĩũujarã. **19** Dios Moisés ñamasirĩre ĩ roticũmasire ñaro cõrone masa jedirore ĩnare gotimasiũuju. Tire ĩ gotiro bero, oveja joa ĩna sũorere, hisopo vãme cuti rũjũjũ siatucõari, vaibũcũrã cabra vãme cutirã rĩare, ta vecũ rĩare ĩna sĩariarã riĩre juacõari, oco rãca ĩna vũorere yosemasĩũuju. To yicõari, Dios ĩ rotimasire

Moisés ĩ ucarijotire vējabate gumasiņuju ĩ. To yicōari, masa ñajedirore quēne to bajirone yimasiņuju. **20** To bajiro yicōari, masare ado bajiro gotimasiņuju ĩ: “Dios m̄are ĩ yirotsere c̄diroti ñaja”, yimasiņuju Moisés ñamasirí, mani ñic̄are. **21** “Mani r̄aca ñaḡūmi Dios” ĩna yir̄c̄ub̄orivire quēne riíne vējabate gumasiņuju Moisés. To yicōari, ti viaye ñase jedirore, to bajiro yimasiņuju. **22** To bajiro Dios ĩ rotimasire ñajare, vaib̄c̄u ĩna s̄arí riíne vējabate gumasiņujar̄a ĩna. To bajiro ĩna yibetijama, ĩnare ĩavariquēnabetiborimi Dios. To bajirone bajiyuja Cristore quēne. ĩre ĩna s̄aro, ĩ ríí ti budibetijama, “Rojose mani yisere masiriobetiborimi Dios”, yimasiaja mani.

**“Cristo ĩ rijabosare s̄orine, ‘Rojose mana ñaama’ manire  
yīāñumi Dios”, yire queti**

**23** To bajiri, Diore yir̄c̄ub̄oriavij̄u ĩna s̄ajaroto r̄joro, ĩna ruj̄re ĩna ye gajeyeūn̄ire quēne, vaib̄c̄ur̄a riíne yayebate gurotiyujar̄a mani ñic̄a. To bajiro yiroticōari, s̄ajarūḡumasiñujar̄a ĩna. To bajiro ĩna yijama, ō vecaj̄u ĩna bajiroti ũn̄ire yir̄a bajimasiñujar̄a ĩna. To bajiboarine toj̄uama Dios ye masu ti ñajare, vaib̄c̄u ríí ĩna yayebate guorotire ũn̄irene yiro, r̄etro quēnaḡū ĩ rijabosare bojayuja. To bajiri, manire ĩ rijabosare ti ñajare, “Rojose mana ñacōari, Dios ya vij̄u s̄ajar̄ar̄aja mani”, yimasire ñaja. **24** Cristo, manire rijabosacōari bero, tudicaticōari, adi macar̄c̄uroj̄u Diore r̄uc̄ub̄oruar̄a, masa ĩna b̄ariavi mere, ō vecagavi Dios ya vij̄uare s̄ajasuju Cristo. To bajiri, ti vij̄u ñacōari, “Quēnaro ñato ĩna” yiḡu, manire s̄enibosacōa ñar̄ūḡūmi. **25** Paia ̄j̄u ñamasuḡū adigodoaḡuma, tocār̄aca c̄mare cojojine, Dios ĩ ñarisōa v̄ame c̄ti sōare jājar̄ūḡumasiñuju, vaib̄c̄u ĩ s̄arí riíre “Masa rojose ĩna yisere masirioya Dios”, ĩnare yibosaḡu. To bajiboarine Cristoj̄uama, ō vecaj̄u Dios ĩ ñaroj̄re ejacōari, adigodoagu paia ̄j̄u ĩ yimasiriarore bajiro yir̄u me, bajiyumi. ĩ masu ruj̄u ríí s̄orine yir̄etobosacōari, Dios ñarisōaj̄re jājasuju. **26** Adigodoagu paia ̄j̄u ñamasuḡū tocār̄aca c̄mane “Masa rojose ĩna yisere, masirioya Dios”, ĩnare yibosar̄ūḡūñuju ĩ. Cristo quēne, paia ̄j̄u ĩ yir̄ūḡumasiriarore bajiro ĩ bajijama, adi macar̄c̄uro Dios ĩ rujeorij̄uj̄ne, cojoji me manire rijabosacōa s̄oadiborimi. To bajiro me bajiyumi Cristo. Cojojine manire rijabosayumi, “Rojose mana ñaama” manire Dios ĩ yīarotire

yigũ. **27** Mani jediro cojojine bajirearona ñaja mani. Mani bajirearo bero, ĩ tũju mani ejato, rojose yirãre, to yicõari quẽnase yirãre ĩabeserũcũmi Dios. **28** Cojojine manire ĩ rijabosare ñajare, jãjarã ñaja mani rojose yibetiriarãre bajiro bajirã. Quẽna Cristo, ĩ tudiejajama, “Rojose mani yisere masirioato Dios” yigũ, me ejarũcũmi. “Manire rijabosayumi” yitũoĩarãjuare juagũagũ bajirũcũmi.

**10** **1** Moisés ñamasirĩre Dios ĩ roticũmasirejuama, “Rojose ĩna yisere ĩnare masiriojeorũcũja yũ”, ĩ yire me ñañuja. Beroju bajiro tire baji rĩjoro cutise ñañuja. To bajiro bajijare, tocãrãca cũmane vaibũcũrãre sĩacõari, “Rojose yũa yisere yũare masirioato Dios” yirã ĩna soemũorotiboajaquẽne, “Rojose mana ñaama”, ĩnare yĩabesuju Dios. **2** Vaibũcũrã ĩna soemũorotise sũorine, “Rojose mana ñaama” rẽmoju-ne Dios ĩ yĩacõajama, “Tudi rojose yũa yisere masirioato Dios”, yibetiboriarãma. **3** Vaibũcũrã rii ĩna soemũorũgũise tocãrãca cũmane rojose ĩna yirũgũrere tũoĩarotire yiro bajiaja. **4** Vaibũcũrã rii ĩna soemũosema rojose masa ĩna yisere, masiriose me ñaja.

**5** Vaibũcũrã rii, ĩna soemũoboajaquẽne, rojose ĩna yisere Dios ĩ masiriobetijare, adi macarũcũrojũre ĩ vadiroto rĩjoro, ado bajiro Diore gotiyuju Cristo:

“Masa vaibũcũ rii ĩna soemũosere bojabeaja mũ. To bajiri, ‘Masare bajiro ruju cutigũ ñato’ yigũ, yũre cõaña mũ.

**6** ‘Rojose mani yisere masirioato Dios’ yirã, vaibũcũ rii ĩna soemũorotiboasere quẽne ĩavariquẽnabeaja mũ.

**7** To bajiri, ado bajiro mũre yaja yũ: ‘Adone ñaja yũ. Mũ bojasere yirũ masa tũju vacũ yaja. “To bajiro bajirũcũmi” mũ ocare masa ĩna yiuacatore bajirone yirũ, bajiaja’”, Diore ĩre yiyuju Cristo, masare ĩ rijabosarotire yigũ.

**8** Quẽna, tirene mũare gotiaja yũ. “‘Rojose mani yisere masirioato Dios’ yirã, vaibũcũ rii ĩna soemũorotiboasere ĩavariquẽnabeaja mũ, mũ roticũcati ti ñaboajaquẽne”, Diore yiyuju Cristo. **9** Quẽna ado bajise yiyuju Cristo: “Mũ bojasere yirũ masa tũju vacũ yaja yũ”, ĩre yiyuju. To bajiro ĩ yijama, ado bajiro ĩre yigũ yiyuju: “Tirũmũju Moisére mũ roticũcatire

yitujacōari, mamejũare masa ñna ajise suori quēnaro ñnare mũ yibosarotire bojagũ bajiaja yũ”, ñre yiyuju. **10** To bajiri Dios ñ rotiriarore bajirone yigũ, cojojine manire rijabosayumi. To bajiro ñ bajire ñajare, rojose mani yisere masiriocōari, “Rojose mana ñaama”, manire yĩagũmi Dios.

**11** Judío masa, paia, tocārācarũmũrine ñna ye moare ñajare, “Rojose ñna yisere masirioato Dios” yirā, cojoji me vaibũcũrā riire soemũorũgũrāma ñna. To bajiro ñna yiboajaquēne, rojose ñna yisere, masiriose me ñaja. To bajiri rojose ñna yisere masiriobecũmi Dios. **12** Jesucristo, cojojine manire rijabosacōari bero, rojose mani yisere yirētosajecōagũ ñnari, Dios ñ rotiñarojũ rũcũbũoriagũre rujyuju ñ. **13** “Mũre terā ñajediro rotigũ ñarũcũja mũ”, yiyuju Dios. To bajiri, “To bajiro yirũcũja” Dios ñ yirere yuñagũmi Cristo. **14** To bajiri, Cristo cojojine manire ñ rijabosare ñajare, “Rojose mana ñaama”, manire yĩagũmi Dios. To bajiro ñ yijare, “Ñajediro rojose mani yirere, mani yiretore quēne, manire yirētosajecōañumi Cristo”, yimasajaja mani. **15** Dios ocare masa ñna ucamasire suorine ado bajise manire gotiami Espĩritu Santo:

**16** “To bajiri, ñnare mame yũ vasoaroti, ado bajiro bajirũaroja: “Yũ masise suorine yũ rotisere tũoĩamasiũarāma”, ñnare yirũcũja yũ. To bajiro yũ yisere bojarā ñnari, quēnaro yirũgũrũarāma’, yami Dios mani ỹjũ.

**17** “Ñnare ñamaicōari, rojose ñna yisere yũ masiriojama, “Rojose yiriarā ñaama”, jũaji ñnare yitũoĩabetirũcũja yũ’, yami Dios”, yigotiaja Dios ocare masa ñna ucamasire.

**18** To bajiri rojose mani yisere Cristo manire ñ yirētosajecore ti ñajare, rojose mani yisere tuditũoĩabetirũcũmi Dios. To bajiri, no yirā vaibũcũ riire soemũomenaja mani.

**“Diore quēnaro ajitirũnrũgũrũarāja mani”, yire queti**

**19** To bajiri, Jesús, manire rijabosacōari, rojose mani yisere yirētosarĩ ñnari, õ vecajũ manire sēnibosa ñagũmi. To bajiri gũimenane Diore sēnito mani. **20** Tirũmũjuma Diore yirũcũbũoriavijũ sudigasero yotoriario ñañuju ti, “‘Dios ñ ñarisõa’ vāme cuti sõare jājamasibeama masa” yĩorijũ. To bajiro ti bajijare, ñna masune Diore sēnimasimena ñnari, paia ỹjũ ñ

sēnibosasere bojarūgūmasiñujarā ĩna. Yuc̄rema Cristo manire ĩ rijabosare ti ñajare, no mani bojarijune mani masune Diore sēnimasiaja mani. **21** Cristo sīgūne ñagūmi ñamasugū manire sēnibosagu. To bajiro yiñagūmi õ vecaju Dios ya viju ñacõari. **22** To bajiri, tocārãcagine, “ĩ bojarore bajirone yirua-ja” yirā, Diore sēnirūgūrãrãja mani. “Cristo suorine manire ĩavariquēnagūmi Dios” yituoĳa tujamenane ĩre sēnirūgūrãrãja mani. To bajiro ĩre yisēnirãne, “Rojose ñaja manire”, yituoĳabetiruarãja mani, Dios, “Rojose mana ñaama” manire ĩ yĩañajare. “Manire rijabosayumi Jesús” yirā, oco rãca ĩna bautizacana ñaja mani. **23** Cristo oca mani buesucocatire ajitirũnu tujabetiruarãja mani. “Quēnaro m̄are yiruc̄ja” Dios manire ĩ yirere tuoĳatujabetiruarãja mani, “Yiruc̄ja” ĩ yirore bajiro yigu ĩ ñajare. **24** Mani rãcanare ĩamaicõari, quēnaro gotiruarãja mani, “ĩna quēne gãjerãre ĩamaicõari, variquēnase rãca ĩnare ejarẽmoato” yirā. **25** Cristore ajitirũnrã ñari, rējarūgūroti ñaja, manire. Gãjerã rējarūgūboariarã ĩna rējatujarore bajiro bajibetiroti ñaja, manire. Rējacõari, “Cristore ĩre ajitirũnu tujamenasa” yirā, quēnaro gãmerã gotirūgūrãrãja mani, “Yoaro me ejaruaroja rojose yirãre Dios ĩ ĩabeserirũmu” yimasirã ñari.

**26** Cristo ocare masiriarã ñaboarine, tire ajitirũnu tujacõari, rojosejuare mani yicõa ñajama, manire yirētosabetiruc̄mi Cristo. **27** To bajiri, rojose manire ĩ yirotire tuoĳagũirã rĩne, Dios masare ĩ ĩabeserirũmu ti ejaro, “Yua uju me ñajama” ĩre yirã rãca rojose tãmuotujabetiriaroju vaborãja mani. **28** Tirũm̄ju Dios ĩ rotimasirere sīgū tire ĩ cudibetijama, ado bajiro bajimasĩnju: Juarã ñacõari, “Rojose yimi” ĩre yirã ĩna ñajama, ĩre ĩamaimenane, Dios ĩ rotiriarore bajirone yirã, ĩre sĩamasĩnjarã ĩna. **29** To bajiro bajimasire ti ñajare, yuc̄rema mame ĩ vasoarere ajitirũnrãrã ñaboarine, “Dios macu me ñarimi Jesús; manire rijabosabetirimi” ĩna yijama, ĩnare maigū Espĩritu Santore rojose ñagõrã yirãma. To bajiri bũto rojose tãmuoruarãma. “Manire rijabosabetirimi Jesús” ĩna yise ti ñaboajaquēne, ĩ rijabosare suorine, “Rojose ĩna yisere masiriocõari, quēnaro yiruc̄ja yu” masare Dios ĩ yimasiriarore bajirone bajiyuja. **30** Rojose ĩna yise vaja bũto rojose ĩna tãmuorotire masiaja mani, Dios ado bajiro ĩ gotirere masa ĩna ucamasire ti ñajare: “Yune ñaja masa rojose ĩna yise vaja rojo-



se ñare yirocũ. Yũ sīgũne riojo tire yimasigũ ñaja yũ”, yigotiaja. Gajeye quêne, ado bajise gotimasiñumi Dios: “Yũ ñaja yũ yarã rojose ña yijama, ñare rojose yirocũ”, yigotimasiñumi Dios. **31** Caticõa ñarũgũrocũ, Dios, rojose yirãre ñajũnisinicoãri, rojose ñare ñ yiroti, gũiose masu ñarũaroja ti.

**32** Dios ñ ejarẽmose rãca Cristore mua ajitirũnũ suocature tuoĩamasiña mua. Ñre ajitirũnrã mua ñajare, gãjerã cojoji me mũare rojose yicama ña. To bajiro mũare ña yiboajaquêne, ñre ajitirũncõa ñarũgũcaju mua. **33** Masa ña ñaro rĩjorojuã mũare ajatudícama ña. To yicõari, mua babarãre ña ajatudíro ñacõari, “Yũã rãcana ñaama”, ñare yĩamaicaju mua. **34** Cristore ajitirũnrãre ña tubiberiarãre quêne, “Yũã rãcana ñaama”, ñare yĩamaicaju mua. To bajiro yirã mua ñajare, rojose mũare yicama gãjerã. Cristore ajitirũncana mua ñajare, gãjerã mua tũju ejacõari, mua gajeyeũnire ãmacama ña. To ña yiboajaquêne, Cristore ajitirũnrã ñari, “Dios ñ gotiriarore bajirone, ña ãmase rẽtoro quẽnase ñacõa ñarotire bũjarũarãja mani, Dios ñ ñarõjuã”, yivariquẽnacaju mua. **35** To bajiro mua yituoĩacature bajirone bajirũaroja. To bajiri, Cristore ñre ajitirũnũ tũjabetirũarãja mua. **36** Rojose tãmuoobarine, ñre ajitirũncõa ñaña mua. To bajiro mua bajijama, Dios ñ bojarore bajiro yiriarã mua ñajare, Dios ñ gotiriarore bajirone õ vecaju quẽnaro mũare yirũcumi. **37** To bajiro bajiroti ti ñajare, ado bajiro gotiaja Dios ocare masa ña ucamasire:

“Yũ cõarocũ Cristo yoaro meaca ejarũcumi. ‘To cõrone ejarũcũja mũ’ yũ yiroticature bajirone ejarũcumi.

**38** ‘Rojose magũ ñaami’ yũ yĩavariquẽnagũ, ‘ñ yirore bajiro yigu ñagũmi’ yũre yituoĩagũ ñari, bajirocacõari bero yũ tũju quẽnaro ñacõa ñarũgũrocũ ñagũmi. To bajiboarine, yũre ajitirũnũ tũjagurema, ñre ñaquẽnabetirũcũja yũ”, yigotiaja Dios ocare masa ña ucamasire.

**39** To bajise Dios ñ gotimasire ti ñaboajaquêne, manijũama, Cristore ñre ajitirũnũ tũjarona me ñaja mani. To bajiri, “Manire rijabosayumi Cristo” yituoĩarã ñari, rojose tãmuotũjabetiriarõjuã vabeticõari, Dios tũju quẽnaro ñacõa ñarũgũrona ñaja mani.

### Diore mani ajitirũnu tujabetiroti queti

**1** **1** “Í yiore bajiro yigũ ñagũmi” Diore ãre mani yitũoĩaja-ma, ado bajiro bajiaja: “Mũare ãsirũcũja yũ” manire ã yijama, “Bũjarũarãja mani”, yitũoĩaroti ñaja. “To bajiro masu bajiaja” Dios ã yijama, maji tire ãabetiboarine, “To bajirone bajiroja”, yitũoĩaja mani. **2** Mani ñicũa to bajiro Diore ãna tũoĩajare, ãnare ãavariquẽnamasiñumi Dios.

**3** “Í yiore bajiro yigũ ñagũmi” Diore ãre yitũoĩarã ñari, ado bajise yimasiaja mani: “Ruyuyaya’ Dios ã yiore bajirone bajimasiñuju, adi macarũcũroaye, õ vecaye quẽne”, yimasiaja mani. To bajiro ã yire ti ñajare, ã rujeoroto rĩjorojũma, manirũgũmasirere ãarũgũaja mani, adi macarũcũro ñasere.

**4** “Í yiore bajiro yigũ ñagũmi”, Diore ãre yitũoĩagũ ñamasiñuju mani ñicũ Abel ñamasirí. To bajiro Diore tũoĩagũ ñari, ãre rũcũbũogũ, Dios ã bojarore bajiro yigũ, vaibũcũre soemũomasiñuju. To bajiro ã yijama, ã gagũ Caín rẽtoro quẽnaro Diore rũcũbũogũ yimasiñuju. To bajiri, Diojũama, “Rojose magũ ñaami”, ãre yĩamasiñuju Dios. Abel ñamasirí tirũmũjũ ã bajirocare ti ñaboajaquẽne, ã yimasiriarore bajiro mani quẽne Diore mani rũcũbũogũajama, Dios ã bojarore bajiro yirũcũbũoroti ñaja manire.

**5** “Í yiore bajiro yigũ ñagũmi”, Diore ãre yitũoĩagũ ñamasiñuju Enoc ñamasirí quẽne. To bajiro Diore tũoĩagũ ã ñajare, “Yũ bojarore bajiro yigũ ñaami” ãre yĩavariquẽnagũ ñari, ã bajirocabetone, ãre ãmicoamasiñuju Dios. To bajiri, ãre bũjabetimasiñujarã masa. To bajirone gotiaja Dios ocare masa ãna ucamasire. **6** Ado bajiro tũoĩarã ñari, Diore sẽniaja mani: “Dios ñagũmi” yimasicõari, “Yũre ejarẽmoña’ ãre yisẽnirãre quẽnaro yami” yitũoĩarã ñari, sẽniaja mani. To bajiro mani yijama, “Í yiore bajiro yigũ ñagũmi” Diore yirã yaja. “Í yiore bajiro yigũ ñagũmi” Diore ãre mani yitũoĩabetijama, manire ãavariquẽnabecũmi Dios.

**7** “Í yiore bajiro yigũ ñagũmi”, Diore ãre yitũoĩagũ ñamasiñuju Noé ñamasirí quẽne. Ado bajiro ãre yimasiñuju Dios: “Masa ñajedirore ruureajeocõarũcũja yũ. To bajiri, cũmua jairica quẽnoña mũ, ‘Rujarobe’ yigũ”, ãre yimasiñuju Dios. To bajiro ã yijare, bajirotire masibetiboarine, “Í yiore bajiro yigũ ñagũmi” Diore ãre yitũoĩagũ ñari, ã gotirore bajirone yigũ,

cūmua jairicare quēnomasiñuju Noé. To bajiri ĩ yarā rāca Noé ĩ rujaborotire ĩnare yirētosomasasiñuju Dios. To bajiboarine, gājerārema ĩ rācana ñaboariarāre, “Ī yirore bajiro yigu ñagūmi Dios” yituoīamena ĩna ñajare, ĩnare yirētososabetimasiñuju Dios. Noéjũarema, “Ī yirore bajiro yigu ñagūmi” yũre yituoīagū ĩ ñajare, “Yũ ĩavariquēnarā rācagu ñaami, ĩ quēne”, Noére ĩre yimasiniñuju Dios.

**8** “Ī yirore bajiro yigu ñagūmi”, Diore ĩre yituoīagū ñamasiniñuju Abraham quēne. To bajiri, “Mũ ñarimacare to cōrone vaveoya mũ. Mũ ñaroti sitare mũre ɥjorũcɥja yũ”, ĩre yimasiniñuju Dios. “Ī yirore bajiro yigu ñagūmi” Diore ĩre yituoīagū ñari, Dios ĩ rotisere ajicōari, vacoamasiñuju ĩ, ĩ ñarotire masibetiboarine. **9** Gājerā ye sita ti ñaboajaquēne, “Adi sita mũre ɥjorũcɥja” Dios ĩre ĩ yire ñajare, “Ī yirore bajiro yigu ñagūmi” Diore ĩre yituoīagū ñari, cojojũ me viriaca bũacōari, ñacudirũgūmasiniñuju Abraham. Ī bajimasiriarore bajirone ñacudimasiñujarā ĩ macũ Isaac, ĩ jānami Jacob quēne “Adi sita mũre ɥjorũcɥja yũ” Dios ĩnare ĩ yire ñajare. **10** To bajiboarine, variquēnagū ñacudimasiñuju Abraham, “Ō vecajũ Dios ĩ quēnoría macare quēnaro ñacōa ñarũgũrũcɥja yũ” yituoīagū ñari.

**11** To bajicōari, Abraham manajo Sara, bũcũo rĩa magō ñamasiniñuju so. ĩ quēne bũcũ ñamasiniñuju. To bajiboarine, “Ī goticatore bajirone yirũcũmi Dios” yituoīagū ñari, Dios ĩ ejarēmojare, macũ cõtumasiniñujarā ĩna. **12** To bajiri, “Bũcũacoarĩ ñaboarine, macũ cõtucōari, jājarā jānerabatía cõtirocũ ñamasiniñumi. Jājarā ñocōa ñarāre, mani cõĩajeobetore bajiro, to yicōari, jare mani cõĩajeobetore bajiro jājarā jānerabatía cõtirocũ ñamasiniñumi Abraham”, yimasija mani.

**13** Abraham, Isaac, Jacob quēne, “Ī yirore bajiro yigu ñagūmi”, Diore ĩre yituoīariarā ñamasiniñujarā ĩna, ĩna catiñaro cōrone. Dios ĩ gotiriarore bajiro ĩnare ĩ yibetiboajaquēne, “Ī yirore bajiro yigu ñagūmi”, ĩre yituoīacōa ñamasiniñujarā ĩna. “Yũ bajirocaro berojũ yũre ĩ goticatore bajirone yũre yirũcũmi”, yituoīarā ñamasiniñujarā ĩna. To bajiro bajirā ñari, “Mũre ɥjorũcɥja yũ” Dios ĩ yire sitajũ ñacudiñarā, ti sitanare ado bajise ĩnare gotimasiñujarā ĩna: “Adi sitajũre yoaro ñabetirũarāja yũ”, ĩnare yigotimasiñujarā ĩna. **14** To bajise ĩna yijama, “Gajeye sita ĩna ñacōa ñarotire tuoīarā yiriarāma ĩna”, yimasija mani. **15** ĩna vadiveoria sitare tuoīarā ĩna yijama, quēna

ti sitajure ñarã, tudicoaboriarãma ñna. **16** To bajiro ñna tũoĩa-jama, ñna vadiveoria sita tũoĩarã me yiyuma. Ñna vadiveoria sita rẽtoro quẽnari sita õ vecajũ Dios ñ ñarojũ varũa tũoĩarã yimasĩñujarã ñna. To bajiro tũoĩarã ñna ñajare, “Yũne ñaja ñna rũcũbũogũ; yũ yarã ñaama ñna”, yivariquẽnamasiñuju Dios. To bajiro yigũ ñari, ñna ñaroti macare ñnare quẽnobosayumi.

**17-18** “¿‘Socũ mene ñ yirore bajiro yigũ ñagũmi’ yũre yitũoĩagũ ñati?” yimasirũ, ñre rũcũbũorã, vaibũcũre ñna soe-mũoriarore bajiro yigũ, ñ macũ sĩgũ ñagũre sĩarotimasiñuju Dios. “Isaac sũori jãjarã jãnerabatia cõtĩrũcũja mũ” Dios ñ yire ti ñaboajaquẽne, “Mũ rotisere yibetĩrũcũja”, yitũoĩabetimasiñuju. **19** “Bajireariarãre ñnare tudicatiomasigũ ñagũmi Dios” yitũoĩagũ ñari, “Yũ macũre yũ sĩacõajaquẽne, caticõõarũcũmi” yitũoĩagũ ñari, ñre ñ sĩagũadijũne, “Ñre sĩabeticõãña” Dios ñ yijare, ñre sĩabetimasiñuju. To bajiro ñ yire ti ñajare, “Rijacoa-boarine, tudicatigũre bajiro ñre ñamasiñuju Abraham”, yimasija mani.

**20** “Ñ yirore bajiro yigũ ñagũmi”, Diore ñre yitũoĩagũ ñamasiñuju Isaac ñamasirĩ quẽne. To bajiro Diore tũoĩagũ ñari, ñ rĩare ado bajiro ñnare gotimasiñuju, Jacob, Esaũre quẽne: “Ñ gotĩriarore bajirone quẽnaro mũare yirũcũmi Dios”, yimasĩñuju.

**21** “Ñ yirore bajiro yigũ ñagũmi”, Diore ñre yitũoĩagũ ñamasiñuju Jacob ñamasirĩ quẽne. To bajiro Diore tũoĩagũ ñari, ñ bajirocaroto rĩjoro, ñ macũ José rĩare, “Quẽnaro mũare yirũcũmi Dios”, ñnare yimasĩñuju ñ. Bũcũ ñari, rũgõĩmabetiarĩ ñaboarine, ñ tueriũ sũorine vũmũrũgõcõari, Diore rũcũbũomasiñuju ñ.

**22** “Ñ yirore bajiro yigũ ñagũmi”, Diore ñre yitũoĩagũ ñamasiñuju José ñamasirĩ quẽne. To bajiro Diore tũoĩagũ ñari, ñ bajirocaroto rĩjoro, ñ yarãre Israel ñamasirĩ jãnerabatiare ado bajiro ñnare gotimasiñuju: “Adi sita Egipto sitare vaveorũarãma ñna, mũa jãnerabatia. Ñna vajama, yũ gõare juacõari, Canaán vãme cõtĩ sitajũ yujerũarãma ñna”, yimasĩñuju.

**23** “Ñ yirore bajiro yigũ ñagũmi”, Diore ñre yitũoĩarã ñamasiñujarã Moisés ñamasirĩ jacũ, ñ jaco quẽne. To bajiro Diore tũoĩarã ñari, Moisés ñ ruyaro bero, idiarã muijua ñre yayiocũomasiñujarã ñna, “Quẽnagũaca sũcare manire ñsiami Dios” yirã. To bajiri egipcio masa ỹjũ, Israel ñamasirĩ jãnerabatiare

rĩamasa ũmũare ĩ sĩarotĩboajaquẽne, ĩre gũimena ñari, ĩ rotĩrore bajiro yibetĩmasĩũjarã ĩna.


**24** “Yĩrucũja’ ĩ yĩrore bajiro yĩgũ ñagũmi”, Diore ĩre yitũoĩagũ ñamasĩũju Moĩsĩs ñamasĩrĩ quẽne. To bajiro tũoĩagũ ñari, bũcũacũ, Egĩpto sita Ʃũ maco so masorĩ ñaboarine, “Egĩpcio masũre bajiro bajĩgũ ñaami” masa ĩna yĩrũcũbũosere bojabetĩmasĩũju Moĩsĩs.

**25** Ado bajiro tũoĩagũ ñari, tire bojabetĩmasĩũju ĩ: “Adi macarũcũrojũ yũ catĩñaro cõro egĩpcio masa rãca yũ bojarore bajiro yũ yĩjama, yũ rijato berojũ quẽnabetoja ti. To bajiri Israel ñamasĩrĩ jãnerabatia Dios yarã rãca baba cũtirũcũja yũ, egĩpcio masa yũre quẽne rojose ĩna yĩroti ti ñaboajaquẽne”, yĩmasĩũju Moĩsĩs ñamasĩrĩ.

**26** Ado bajiro tũoĩagũ ñari, to bajiro yĩmasĩũju Moĩsĩs: “Egĩpto sitana ĩna cũose jairo vaja cuti rẽtoro ñamasuse ñaja, Cristo ĩ ejaroti Israel ñamasĩrĩ jãnerabatia ĩna gotĩsejũama”, yitũoĩacõamasĩũju.

To bajiri, “Ĩna rãca yũ ñajare, egĩpcio masa rojose yũre ĩna yĩboajaquẽne, quẽnacõarũaroja”, yitũoĩacõamasĩũju Moĩsĩs. To bajiro ĩ tũoĩajama, ĩ rijato bero, “Cristo sũorine quẽnaro yũre yĩrucũmi Dios” yitũoĩagũ yĩmasĩũju.

**27** Egĩpcio masa Ʃũ ĩ jũnisinisere gũĩgũ me, ti sitare vaveomasĩũju Moĩsĩs. “Ĩ yĩrore bajiro yĩgũ ñagũmi Dios” yitũoĩagũ ñari, Diore ĩre ĩabetĩboarine, ĩ bojarore bajiro ĩ yĩrotire masĩcõari, vacoamasĩũju. **28** “Ĩ yĩrore bajiro yĩgũ ñagũmi Dios” yitũoĩagũ ñari, Israel ñamasĩrĩ jãnerabatiare “Dios ĩ rotĩrore bajiro Pascua boserũmũ yito mani” yĩgũ, oveja sãrĩ rĩire cojovi rũyabeto sojerire turotĩmasĩũju. Tire ĩamasĩcõari, Israel ñamasĩrĩ jãnerabatia ĩna rĩa cũtisũoriarãre “Dios ĩ cõagũ ángel, sĩagũ sãjabeticõato” yĩgũ, yĩmasĩũju Moĩsĩs ñamasĩrĩ.



*Hebreos 11.30*

**29** “Í yirore bajiro yigũ ñagũmi Dios”, yituoĩarã ñamasĩũjarã Israel ñamasirĩ jãnerabatia quẽne. To bajiro Diore tuoĩarã ñari, Diore ajitirũncõari, moa riaga Oco Sũarisa vãme cutiyare jẽamasĩũjarã. Dios ĩ masise sũori “Riagare jẽato” yigũ, oco mano ĩ yibosajare, carari maare jẽamasĩũjarã ĩna. To bajicõari, egipcio masa ĩnare tuoũarã, sũyãjẽamasiboayujarã. ĩna jẽaejabetone, ruureacõamasĩũju Dios.

**30** To bajiro ĩna bajimasiriaro bero, Israel ñamasirĩ jãnerabatia Jericó vãme cuti macare ĩmarũarã, ti macare ĩna matariacũni sũyarojuare ejaçõari, cojomo cõro jũa jẽnituarirãcarũmũri rũja gãnibiarũgũmasĩũjarã ĩna. To bajiro ĩna bajirone, “Í yirore bajiro yigũ ñagũmi Dios” yituoĩarã ĩna ñajare, ti maca matariacũni cague vẽjacoamasĩũju ti. **31** Ti macago Rahab vãme cutigo, mũũare ajeriarã cuticõari, vaja sãnigõ ñaboarine, “Í yirore bajiro yigũ ñagũmi Dios”, yituoĩagõ ñamasĩũju so. To bajiri Israel ñamasirĩ jãnerabatia jũarã ĩarudirimasa ejarãre quẽnaro ĩnare yimasĩũju so. Quẽnaro ĩnare yirio ñari, so ya macana Diore ajirũcũbũobetiriarã rãca rijabetimasĩũju.

**32** Jẽre jairo mũũare gotibũ yũ. Tire bajiro Diore tuoĩamasiriarã jediro ĩna bajimasirere yũ ucajama, yoaro ucabogũja yũ. Gedeón, Barac, Sansón, Jefté, David, Samuel, to yicõari, Diore gotirẽtobosariarã jediro ĩna bajimasirere quẽne ucabogũja yũ. **33** ĩna quẽne, “Í yirore bajiro yigũ ñagũmi Dios” yituoĩarã ñari, gaje sitana rãca ĩna gãmerã sãajama, ĩnajũa rĩne, ĩnare sãacõarũgũmasĩũjarã ĩna. Gãjerãma, quẽnaro masare rotimasĩũjarã ĩna, ĩna yarãre, “Quẽnaro gãmerã yato” yirã. Gãjerãma, rojose tãmuorã ñari, “Yũare ejarẽmoña” yirã, Diore sãnimasĩũjarã ĩna. To ĩna yijare, ĩ gotiriarore bajirone ĩnare ejarẽmomasiũju Dios. Gãjerãrema, “Í yirore bajiro yigũ ñagũmi” Diore ĩna yituoĩajare, “Yaia, león vãme cutirã ĩnare babe-ticõato”, yiyumi Dios. **34** Gãjerãma, jeame bũto mũjũroju ĩna reatĩariarã ñaboarine, mũbetimasĩũjarã. Gãjerãma, ĩnare ĩaterimasa jariaseri rãca ĩna sãarũasere ĩacõari, rudimasĩũjarã. Gãjerãma, tĩmabetiboariarãne, Dios ĩnare ĩ ejarẽmojare, tĩmarã ñacoasujarã ĩna. To bajiri, ĩnare ĩaterã sãarã ejarãre ĩnajũa rĩne sãareacõarũgũmasĩũjarã. **35** Rõmia quẽne, “Í yirore bajiro yigũ ñagũmi” Diore ĩre yituoĩarã ñari, bajireacoanare Dios ĩ masise sũori ĩ catorãre yarã cutiyujarã.

Gãjerãma, “Í yirore bajiro yigũ ñagũmi Dios” yituoĩarã, ado bajiro bajiyujarã: Ñnare ïaterimasa ñnare ñejecõari, “Dios ocare mũ ajitirũnu tujabetijama, mũre sïaruarãja yũ”, ñnare yigotiyujarã ñna. To bajiro ñna yiboajaquẽne, “Í yirore bajiro yigũ ñagũmi Dios” yirã, ñnare gũimenane, ado bajiro tuoĩañujarã ñna: “Ñna siacõajaquẽne, tudicaticõari, Dios tujũ rëtoro quẽnaro ñaruarãja mani”, yituoĩamasĩñujarã ñna. To bajiro yirã ñna ñajare, ñnare siacõañujarã. **36** Gãjerã quẽne, “Í yirore bajiro yigũ ñagũmi Dios” yituoĩarã ñnari, ado bajiro rojose tãmuoñujarã ñna: Ñnare ajatudícõari, ñnare bajeyujarã. Gãjerãrema, ñna ãmoriyũ cõmemarine siacõari, tubibecũñujarã ñna. **37** Gãjerãrema, gũtane ñnare reasĩañujarã. Gãjerãrema, ñna rujũ gũdarecone yijetasiacõañujarã. Gãjerãrema, jariaseri rãca ñnare saresiacõañujarã ñna. Gãjerãma, sudi manijare, vaibucugasene sãñañujarã. To bajicõari ñna ñaroti maca bũjamenane, maioro rojose yiecocudirũgũñujarã ñna. **38** “Í yirore bajiro yigũ ñagũmi Dios”, yituoĩarã ñañujarã ñna. Dios ï ïamairã ñaboarine, gãjerã ñna ïaterã ñnari, ñna ñaroti bũjamenane masa manoyũ, gũtayucũri vatoayũ gũtaviriyũ ñacudiyujarã ñna.

**39** Rojose tãmuoriarã mũare yũ gotirã, jediro ñañujarã “Í yirore bajiro yigũ ñagũmi Dios” yituoĩariarã. To bajiro Diore tuoĩarã ñnari, “Manire ïavariquẽnagũmi Dios”, yituoĩañujarã ñna. To bajise tuoĩarã ñaboarine, nijũane “Quẽnaro yirucũja yũ” Dios ï yirere yiecobesuma maji. **40** Ñna tuoĩase rëtoro quẽnase ï yirũajare, to bajiro bajiyuma maji. To bajiri, yucũrema, mame Dios ï vasoase ñajare, ñnare, manire quẽne, “Rojose mana ñaama”, yĩagũmi Dios.

**“Cristore ajitirũnucõa ñarũgũruarãja mani”, yire queti**

**12** **1** To bajiro mani ñicua ñna bajirere mani ajijama, “Í yirore bajiro yigũ ñagũmi” Diore ïre yituoĩacõari, quẽnaro ïre ajitirũñũma ñna”, yimasiaja mani. To bajiri josase ti ñaboajaquẽne, mani quẽne, Diore ajitirũnu tujabeticõato mani. Mani tuana rojose manire ñna yirotijama, ñnare cãdibetiruarãja mani, “Ñna sũori Dios ï bojabeti yirobe” yirã. Jesucristo, adigodojũ ñagũ Diore ï ajitirũnũriarore bajiro mani quẽne Diore ajitirũnucõa ñarũgũruarãja. **2** Cristore tuoĩatujabetiroti ñaja manire. Ñne ñaami mani tuoĩamasirotire cõagũ.

To bajiri, manire ĩ ejarēmojare, “Ī yirore bajiro yigũ ñagũmi Dios”, yitũoĩa tũjabeaja mani. Yucútērojũ masa ĩre ĩna jajuturo, bũto rojose tãmuogũ ñaboarine, Dios tũjũ quēnaro ĩ ñarotijũare tũoĩagũ ñari, ĩre ĩna yirotire, “Yibeticōato”, yibesumi. To bajiri manire rijabosacōari, yucũrema, õ vecajũ Dios ĩ rotĩñarojũ ĩ rojojocatũa rũcũbuorijũre rujigũ ñagũmi.

**3** Jesús adigodojũ ĩ ñaro, bũto rojose ĩre ĩna yiboajaquēne, quēnasejũare yicōa ñañumi. To bajiri mani quēne, rojose tãmuorã ñaboarine, quejemenane, quēnasejũare yicōa ñarũgũroti ñaja. **4** Jesucristo rojose ĩ tãmuoriarore bajiro tãmuomenaja mũa maji. To bajiri, rojose tãmuorã ñaboarine, ñacōarãja mũa. **5** Diore ajitirũnrã ñari, ĩ rĩare bajiro bajirãre, “Rojose tãmuorã ñaboarine, ‘Ī yirore bajiro yigũ ñagũmi’ yũre yitũoĩa tũjabeticōato ĩna” yigũ, mũare gotimasioñumi. Tire masiritirãja mũa. Ado bajise gotiaja ti Dios ocare masa ĩna ucamasire:

“Масѹ, ‘Ado bajirojũna yiya’, mũre yũ yisere ajitebesa.  
Rojose tãmuogũ ñaboarine, yũ bojarore bajiro  
yicōa ñaña.

**6** Yũne ĩna jacũre bajiro bajigũ ñari, yũ mairãre, ‘Ado bajirojũna mũa yijama, quēnarũaroja’ ĩnare yirũgũaja yũ”, yigotiaja Dios ocare masa ĩna ucamasire.

**7** To bajiri, rojose tãmuoarine, “Ī yirore bajiro yigũ ñagũmi Dios”, yitũoĩa tũjabesa mũa. Rojose mũa tãmuose suorine quēnaro mũare ĩ yirotire masiogũ yigũmi Dios. Sīgũ ĩ rĩare ĩ gotimasiorore bajiro yigũ, yigũmi Dios, “Yũ bojarore bajiro yirã ñato” yigũ. Rĩa cõtĩrã jedirone, ĩna rĩare gotirũgũrãma.

**8** To bajiri, Dios quēne, “Yũre ajitirũnrã ñari, yũ rĩare bajiro bajirã ñaama” yigũ, ĩnare gotimasiorũgũami Dios. To bajiro mũare Dios ĩ yibetijama, jacũ manare bajiro ñaborãja mũa.

**9** Mani jacũa, manire ĩna yirere tũoĩato mani. Rĩamasaca mani ñaro rojose mani yijare rojose manire yiriarãma ĩna, “Yũa bojarore bajiro yirã ñato” yirã. To ĩna yirore ajirũcũbuoriarãja mani. To bajiri Dios quēne, “Yũre bajiro quēnaro yirã ñato” yigũ, rojose mani yijare, rojose manire ĩ yijama, bũtobũsa ĩre ajirũcũbuoroti ñaja manire. ĩre mani ajirũcũbuojama, mani rijato bero, tudicaticōari, ĩ rãca quēnaro ñacōa ñarũgũrũarãja mani. **10** Mani jacũa, ĩna gotimasiojama, ĩna yimasiro cõro manire gotimasioriarãma ĩna. Diojũama, masijeogũ ñari,



“Ado bajirojua ñna yijama, quēnaja”, yimasigū ñagūmi. To bajiro yigū ñajare, yuc̄rema rojose tām̄uobarine, quēnaro ñre mani ajirūc̄ub̄uo tujabetijama, ñre bajiro quēnaro yirā ñaruarāja mani. **11** Rojose mani yise vaja “Rojose tām̄uato ñna” yigū, Dios rojose manire ñ yijama, sutiritirāja mani. Rojose mani tām̄osere t̄uoĩac̄ari, “Ado bajise manire yimasigū yigūmi Dios” mani yit̄uoĩamasijama, ñ bojarore bajiro yiroti ñaja. To bajiro mani yijama, quēnaro ñaruarāja mani.

**“Dios ocare mani ajitirūnu tujajama, güiose ñaja”, yire queti**

**12** To bajiri, “Dios manire ñ gotiriarore bajirone quēnaro yir̄uc̄umi” m̄ua yit̄uoĩa s̄uocatore bajiro yit̄uoĩaña m̄ua quēna. Tire t̄uoĩac̄ari, m̄ua yimasiro c̄orone Diore quēnaro ñre ajitirūn̄ña m̄ua, “Ñajediro Dios ñ gotiriarore bajirone quēnaro manire yato” yirā. **13** To bajiri, Dios ñ bojasere yiruarā, quēnaro t̄uoĩaña m̄ua. Quēnaro t̄uoĩac̄ari, ñ bojarore bajiro m̄ua yijama, m̄ua babarā quēne Cristore b̄utob̄usa ajitirūn̄ruarāma ñna.

**14** M̄ua jediro, quēnaro gāmerā yirūgūr̄uarāja m̄ua, “Quēnaro ñac̄ari, b̄utob̄usa Dios ñ bojarore bajiro yirā ñato mani” yirā. To bajiro m̄ua yibetijama, Diorāca quēnaro ñabetiruarāja. **15** M̄ua rācana ñajedirore quēnaro ejarēm̄orūgūr̄uarāja m̄ua, “Cristo s̄uori Dios quēnaro manire ñ yisere, ‘Socase ñaja’ yit̄uoĩaroma ñna” yirā. Socase yigū ñajama, “Ñ suorine Dios ocare ajitirūnu tujac̄ari, ñj̄uare ajis̄uyaroma” yirā, quēnaro gāmerā ejarēm̄orūgūña. **16** To yic̄ari, “Gāmerā ajeriarā cutiroma” yirā, m̄ua rācanare quēnaro gotiruarāja m̄ua. Esaú ñamasirire bajiro yibetic̄oña m̄ua. Ñ gagū ñaboarine, bare bar̄ne, “Ȳure m̄u ecajama, m̄u bedire bajiro bajir̄uc̄uja ȳu”, ñre yimasin̄uju. To yic̄ari, “Mani jac̄u ñ rijaroto r̄ijoro, ‘Ȳu mac̄u ñas̄uoḡu ñaami’ ñ yiroc̄u ñar̄uc̄uja m̄u. To ñ yiroc̄u ñari, ‘Quēnaro yir̄uc̄uja’ Dios ñ yirere yiecoroc̄u ñar̄uc̄uja m̄u”, yimasin̄uju Esaú, ñ bedire. **17** “Dios ocare ajir̄uc̄ub̄uobec̄u ñañumi”, ñre yimasijama mani, ado bajiro ñna bajimasire ñajare: Ñ jac̄u ñ bajirocaroto r̄ijoro, “Ñ gagū ñaja m̄u. To bajiri quēnaro m̄ure yir̄uc̄umi Dios”, ñ jac̄u ñ yisere ajir̄uamasiboaȳuju Esaú. “J̄ere m̄u bedij̄uare gotiyuja ȳu” ñ yisere ajic̄ari, b̄uto otiboarine, “Quēnaro yir̄uc̄uja” Dios ñ yirere b̄ujabetimasin̄uju Esaú.

**18** To bajiri, mame Dios ñ vasoasere ajir̄uc̄ub̄uorā ñari, m̄uama, mani ñic̄na ñna ñamasire ñn̄ire ñabesuja m̄ua. Ñnama,

gūtaujū ñacudirí Moisés í rojaejaro bero, gūtau ti ũjæsere ñañuma. To bajicōari ti buesene rētiacōamasiñuju. Buto bũjo quēne jamasiñuju. To bajicōari, mino buto vamasíñuju. **19** To bajiro ti bajirone, jutiria trompeta vāme cutia busisere ajicōari, buto güimasiñujarā ña. To bajicōari, Dios í ocaruyusere ajimasiñujarā ña. Tire ajigüicōari, to cōrone í ñagōtũjasere bojamasíñujarā ña. **20** Dios í rotirere no bajiro yimasibetica yirā, “To cōrone ñagōtũjato”, ñe yimasíñujarā. Ado bajiro ñare rotimasiñuju Dios: “Sīgũ masu, to yicōari, vaibucu ũgũ quēne gūtaure í cudajama, gūtane reasīacōaroti ñaja”, yimasíñuju. **21** ña ñamasire buto güiose ti ñajare, Moisés ñamasirí quēne, “Güigũ, nanaja yu”, yimasíñuju.

**22** Mani ñicua ña bajimasiriarore bajiro bajirā me ñaja mña. To bajiri, õ vecajū ñaricu gūtau joejū ñarimaca Jerusalén vāme cuti macajū Dios ñacōa ñarũgũgũ ya macajū ñarāre bajiro bajiaja mña. To bajicōari, Dios tuana jājara ángel mesa rējacōari, Diore ña rucuburojū ñarāre bajiro bajiaja mña. **23** To bajicōari, “Ado cōro ñaama yu rāca ñarũgũrona” Dios í yiuaturiarā ñari, í tũjū ñarā rāca rējarāre bajiro bajiaja mña quēne. Masa ñajedirore ñabeserocu tũjũre güimenane ejarāre bajiro bajiaja mña. Rojose yiriarā ñaboarine, Jesúre ajitirũnũriarā ña ñajare, í tũjū ña ejaro, “Rojose mana ñaja mña” Dios í yĩriarā rāca ñarāre bajiro bajiaja mña quēne. **24** To bajiri, Jesús tũjū ejarona ñaja mña. Ñe ñaami, “‘Mame oca mñare vasoarucũja yu’ Dios í yiriarore bajiro bajiato” yigũ, manire rijabosarí. To bajiri, í rií suorine, “Rojose mana ñaama”, manire yĩñaumi Dios. To bajiboarine tirũmũjū, Abel ñamasirí í sīacomasiñejama, “Í rií suorine ‘Rojose mana ñaama’ masare Dios í yĩaroti me ñamasíñuja”, yimasíñuja.

**25** To bajiri Cristo í rijabosare suorine mame oca Dios í vasoarere ajitirũnũroti ñaja. Moisés ñamasiríre Dios í roticũmasirere cojoji me ña cudibetijare, rojose ñare yirũgũmasíñuju Dios, “Yitũjacōari, yu bojasejũare yato ña” yigũ. To bajiro í yimasire ñajare, mame í vasoasere quēne mani ajibetijama, “Rojose manire yirucumi”, yimasíñuja mani. **26** Gajeyerema tirũmũjū mani ñicua ñamasiriarāre gotigũ, sita nũrũarojū ñagōmasíñuju Dios. Í ocare masa ña ucamasire quēna í yírotire ado bajiro gotiaja: “Quēna yinũrũojama, adi macarucũroaye, õ vecayere quēne yinũrũobatorucũja yu”,

yigotiaja, Dios ocare masa ñna ucamasire. **27** To bajiro quēna Dios, “Yirucija” ĩ yirere mani ajijama, “Adi macarucro ñase jediro ĩ rujeorere reajeocōarucumi”, yimasiaja mani. Rēmojne “Yayibetiraroja” ĩ yirujeore rñe ruyararoja ti. **28** To bajiri socase me ti ñajare, “Diore ajitirñuriarā ñna bajireajama, ĩ rotiñaroje ñna caticōa ñarotire yig, ĩ catisere ĩ ĩsiriarā ñari, ĩ rāca ñarūgūrārāma”, yimasiaja mani. To bajiro mani bajiroti ti ñajare, Diore rucuborā, “Quēnaro yuare yaja m”, ĩre yisēnito mani. To yicōari, ĩ bojarore bajiro yirūgūto mani, “Manire ĩajūnisinicōari, rojose manire yiromi” yirā. **29** ĩ bojabeti yirāre rojose yig ĩ ñajare, ĩ bojarore bajiro yiroti ñaja manire.

**“Ĭavariquēnato Dios” yirā, quēnaro mani yiroti queti**

**13** **1** To bajiri adi mware gotitusaja y: Ado bajiro yiñaña m, “Manire ĩavariquēnato Dios” yirā. Cristo yarā ñari, gāmerā ĩamaitujabesa m. **2** Gajeroana m masimena Cristore ajitirñurā m tu ñna ejajama, quēnaro ĩnare yiruarāja m. Mani ñicua quēne, gajeroana ñna masimena ñna eja-boajaquēne, quēnaro ĩnare yirūgūmasiñujarā ñna. To yirā ñari, cojojirema ángel mesare “Dios ĩ cōariarā ñarāma” yimasibetiboarine, quēnaro yimasñujarā ñna.

**3** Gājerā Cristore ajitirñurāre tubibe ecorāre masiritibesa m. Mani quēne mani tubibe ecojama, “Quēnabetoja” yituoīarā ñari, ejarēmoña. Gājerāre quēne, rojose ĩnare ñna yijama, m quēne ñna rāca rojose tāmōrāre bajiro ĩnare ĩamaicōari, ejarēmoña m.

**4** Gāmerā m bojasere quēnaro rucuboroti ñaja. Manajo cutirā, manaje cutirā, manajo mana, manaje mana quēne gājerā rāca ajeriarā cutibesa. To bajiro m yijama, “Rojose tāmōrārāma”, mware yirucumi Dios.

**5** Jairo gājoa suorā tuoīabesa m. Mojoroaca suorā ñaboarine, “Jēre ñacōaja”, yituoīacōaña m. Ado bajiro Dios ĩ yirejare tuoīaña: “Mure vaveobecne, m rāca ñacōa ñarūgūrucija y”, yiyumi Dios, manire. **6** To bajiro ĩ yirere mani ajijama, “Soc me yiyumi” yimasicōari, Dios oca ti gotirore bajiro ado bajiro yimasiaja mani:

“Dios ñaami rojose y tāmōro, yure ejarēmogū. To bajiro rojose yure yirāre güibeaja y”, yaja mani.

**7** Cristo ocare mware gotimasiosuocana ña bajicatire masiritibesa mwa. “Í yirore bajiro yigu ñagūmi Cristo” yituoīarā ñari, ñe ajitirūnū tujamenane, bajireacoacama ña. ña bajicatore bajiro, Cristore ajitirūnū tujabesa mwa quēne.

**8** Jesucristo ñagūmi tuoīavasoabecu, cojojire bajiro quēnaro yirūgūgū. To bajiri mware gotimasiosuocanare quēnaro ñare ejarēmori, manire quēne to bajirone ejarēmocōa ñarūgūrucu-mi. **9** Mware ña gotimasiosuocature bajiro me, ricati ña gotimasiosere ajitirūnūbeticōaña mwa. Ado bajiro mware gotirūgūrāma ña: “Babetiruarāja mwa’ mani ñicua ñamasiriarā ña yimasirere mwa ajirūcubuoajama, quēnaja”, mware yirāma ña. To bajiro mware ña yigotise me, ado bajiro mwa yituoīarūgūsejua ñaja quēnase: “Dios manire ñamaicōari, manire ejarēmorcumi” mwa yituoīarūgūsejua ñaja quēnase. To bajiro mwa tuoīajama, butobusa ñ bojarore bajiro yirā ñarūtuaruarāja mwa.

**10** Cristo manire ñ rijabosare suori Moisére Dios ñ roticūmasirore bajiro me bajiaja. Moisére Dios ñ roticūmasirere ajitirūnrā, rojose ña yisere “Masirioato Dios” yirā, “Vaibucurā soemuocōa ñaroti ñaja” yituoīarā ña ñajare, “Rojose mana ñaama”, ñare yīabecumi Dios. Manijwarema, vaibucu rii ña soemuose ũnirene yigu, Cristo ñ rijabosare suori, “Rojose mana ñaama” Dios ñ yīarā ñaja mani. **11** Moisére Dios ñ roticūmasirere ajitirūnūgū paia cju ñamasugūma, vaibucu ña sīarī rii ēoriabajare āmisājacumi, Dios ñ ñarisōa vāme cuti sōaju, “Rojose ña yisere masirioato Dios” yigu. ñ sājatoye, vaibucu rujuwarema ti maca sojuaju ānivacōari, soerocacōarāma ña, ñe ñaterā ñari. **12** To bajiro vaibucure ña ñaterore bajiro bajiyumi Jesús quēne. Jerusalén maca sojuaju yucūtēroju jajusīa ecoyumi, rojose mani yisere manire yirētobosagu. To bajiro bajiyumi, “Rojose mana ñaama” manire Dios ñ yīarotire yigu. **13** To bajiro Jesús ñ bajibosare ñajare, Moisére Dios ñ roticūmasirere ajitirūnrā rojose mware ña yiboajaquēne, tire ajirūcubuo tujacōari, mame Dios ñ vasoarejuare ajitirūnūroti ñaja mware. **14** To bajiro bajiruarāja mwa, adigodoayere tuoīabeticōari, “Dios ñ ñarimaca ñaja mani ñacōa ñarūgūroti maca” yituoīarā ñari. “Adi macarucurojurema manija mani ñacōa ñarūgūroti maca”, yimasirāja mwa. **15** To bajiri, Jesucristo ñ rijabosare suori, Diorāca mani ñacōa ñarūgūroti ti ñajare, vaibucurāre sīacōari, ña soemuose ũnirene yirā,

“Quēnamasucōaja m̄” Diore yirūcubuo tujabetiroti ñaja, manire. **16** To yicōari, “Quēnaro gāmerā yiroti ñaja manire” yirere masiritibeticōaña m̄. To yicōari, m̄a tuana maioro ña bajisere masicōari, m̄a cūose ñnare ñsiña. To bajiro m̄a yijama, Dios ñ ñavariquēnase yirā, yiruarāja m̄a.

**17** M̄are ūmato ñarāre quēnaro cūdiya m̄a. “¿No bajiro ñnare ñatirūnucati m̄a?” manire yisēñiagūmi Dios” yimasirā ñari, tocārācarūm̄ne, “Diorāca quēnaro ñato ña” yirā, m̄are ñatirūnūgūrāma ña. To bajiri, quēnaro ñnare m̄a cūdiya, to bajiro m̄a yisere, “Ado bajiro quēnaro m̄re ajitirūncama ña”, Diore ñre yivariquēnararāma ña.

**18** To bajiri, “Dios ñ bojarore bajirone yato ñ” yirā, Diore yure sēnibosaya. Dios ñ bojase jediro yirūgūaja ȳ. To bajiro yigū ñari, tuoñarejaibecūne ñacōaja ȳ. **19** To yicōari, yoaro mene quēna m̄a t̄ ȳ varotire yirā, yure sēnibosaya m̄a, Diore.

### “Quēnaro m̄are yato Dios”, yire queti

**20** “Quēnaro ñato ña” yigū manire ejarēmogūmi Dios. ñne ñagūmi, mani ūȳ Jesús manire ñ rijabosaro bero, ñre catiorí, ñre catiocōari, “Ovejare ñatirūnugūre bajiro, ȳ yarāre quēnaro ñnare ñatirūnucūja m̄” ñre yirí. Jesús ñ rijabosare suorine, “Rojose ña yisere masiriocōari, quēnaro yirūcūja ȳ” masare Dios ñ yimasiriarore bajirone bajiyuja. To bajiro ñ yise jedibetiruaroja. **21** Ado bajiro Diore m̄are sēnibosaja ȳ: “‘M̄ bojarore bajiro yato ña’ yigū, ñnare ejarēmoña m̄”, m̄are yisēnibosaja ȳ, Diore. “‘Jesucristo ñ ejarēmose rāca quēnaro yaja m̄a’ yivariquēnato” yigū, Diore m̄are sēnibosaja ȳ. Quēnarētogū Cristo ñ ñajare, “Quēnamasucōaja m̄”, ñre yirūcubuo tujabetiroti ñaja, manire. To bajirone bajicōa ñarūgūato.

**22** Mojoroaca m̄are papera ucacōaja ȳ. To bajiri, “B̄utob̄sa, ‘ñ yirore bajiro yigū ñagūmi’ Cristore ñre yituoñato ña” yigū, m̄are ȳ gotisere quēnaro tire ajimasiña m̄a, ȳ mairā. **23** Mani maigū Timoteore ña tubiberíre jere ñre bucōañujarā. To bajiri, yoaro mene ñ eajama, ñ rāca m̄a tuj̄ varucūja ȳ.

**24** M̄are ūmato ñarimasa, to yicōari, m̄a rācana Jesucristore ajitirūnūñā jediro, “Quēnato”. “Quēnato”, m̄are yama Italia sitana quēne.

**25** Dios, m̄are ñamaigū ñari, quēnaro m̄are yato ñ. To cōro ñaja.